


3r

4119

N




LECTURA CRISTIANA



Número 3.

Historia di Testament Bieuw.



VICARIATO APOSTOLICO

1911.



PPM 008 959341

BIBLIOTHEEK KITLV



0078 3868

ANTIQUARIAAT BATAVIA

Dorpsstraat 171

NL-2992 AA Barendrecht

The Netherlands

651-

LECTURA CRISTIANA.

LECTURA CRISTIANA



Imprimí na Imprenta di Vicariato 1911.

3R-4119-N

LECTURA CRISTIANA.

Numero 3.

1911.

HISTORIA DI TESTAMENT BIEUW.

I.



Vicariato Apostólico.



LECTURA CRISTIANA

Nihil obstat.
P. fr. Jac van Baars. O. P.
Censor libr.
Curaçao, die 31 Augusti 1911.

Imprimi permittimus
fr. Ant. ter Maat. O. P.
Vic. provinc.

Nihil obstat.
P. fr. J. Gijlswijk.
Ord. Præd.

Imprimatur
fr. Michaël Gregorius Vuylsteke.
Vic. Ap. Cur.
In Curaçao 1911.



QUERIDO LEZADORNAN.

Mi ta ofrece boso awé numero 3 di „Lectura Cristiana,” boenita ilustrá coe historia koe toer Cristian mester sabi, esta : Historia di Testament Bieuw i bien pronto lo boso haja den numero 4: Historia di Testament Nobo.

Leza nan no un bez, ma muchoe bez. Pa un Cristian ta necesario koe e conoce bon historia sacá for di Biblia Sagrada. Ta di spera koe pronto lo no tin un cas sin djé. P'esai nos a tene su precio baratísimo, cumpliendo di es manera coe deseo di Su Santidad Pio X, koe ta pidi pa nos pone toer Cristian na ocasion di haja e Lectura di Biblia na cas pa nan lezé i estudié coe amor.

Pietermaai.

Na fiesta di Pascu di N. S. H. C. 1911.

fr. Alph. L. M. J. Jansen.
S. O. P.

Historia de Testamentis Veteris
et Novi
Ab Iohanne Jacobo Gualtero
Sacerdote Regulari
Auctore
Lugduni Batavorum
1711

Pictoribus

Na festa di Pasca di N. S. H. C. 1711

In Aedibus I. M. J. Jansen.
S. O. P.

Historia di Testament Bieuw.

I.

1. Creacion di mundoe. 2. Adam i Eva.

1. Den principio Dios a cria cieloe i tera for di nada pa su Palabra. Ma tera tabata brutoe i bashí, i tapá coe awa. Toer cos tabata scur. Anto Dios a bisa: „*Sea luz!*” I luz a bini. Esai tabata promer dia. Di dos dia Dios a traha firmamento, i a jamé: *cieloe*. Di tres dia Dios a



reuni awa na ún lugar i a jama e lugar: *lamar*. Mes ora tera secoe a sali, i Dios a manda koe l'e doe-na jerba berde i paloe di fruta. I tera jena coe paloe-

nan, fruta i flor, coe toer sorto di jerba. Di cuater dia Dios a cria solo, luna i strea; di cincoe páharanan di cieloe i piscarnan di awa; di seis dia otro animalnan di tera i porfin Dios a traha hende. I Dios a mira toer cos koe El a

cria, i tabata mashá bon. Di siete dia Dios a sosega di toer su obra koe El a traha.

2. Ora Dios kier a traha hende, E dici: „Larga Nos cria hende segun Nos imagen i semehanza; l'e manda riba piscarnan di lamar i páharanan di cieloe i bestianan di tera.” Dios a forma curpa di hende for di lodo di tera i a soepla un alma inmortal den djé, koe tabata semehanza di Dios mes. E promer hende koe Dios a cria ta jamá Adam, está: *homber di tera*. Dios a larga toer animal bini cerca djé, i el a doena na cada un su nomber propio. Caba Dios a toema un ribtji for di Adam, ora e tabata na sonjo, i a cria for di djé e promer muher, jamá: Eva. Adam i Eva tabata e promer par di hende, koe toer hende den henter universo a sali for di djé.

Dios a cria cieloe i tera pa su propia gloria i felicidad di toer criatura racional.

No tin criatura pa chikitoe i poco e por ta, koe no ta revela Dios su sabiduria, omnipotencia i bondad.

Dios a sosega di siete dia, pa sinja nos di larga para toer trabao pisar un dia den seman.

II.

Creacion i caida di Angelnan.

Fuera hende Dios a cria Angelnan tambe for di rada i den un estado mashá feliz. Ma E no a pone nan unbez den cieloe, pasobra ta pa nan obediencia na ley di Dios nan mester a merece bienaventuranza eterna. Ma mashá Angel tabata desobedecido, i nan a lamanta contra Dios. P'esai

Dios a saca nan for di cielo. Mal Angelnan jama *diabel* ó *demonio*; nan hefe ta Lucifer. Dios a manda Arcangel Miguel riba nan coe un ehército di bon Angel, koe pa poder di Dios a tira toer den fierno.



Diabelnan tin mashá odio contra Dios i nan ta codiciá hende. Nan no por haci nada, si Dios kier stroba nan; ma Dios ta permiti pa nan tenta hende. Ma tentacion no ta picar; te ora koe nos consenti den tentacion nos ta haci maloe. Ma si nos ta resisti na tentacion, Angelnan ta juda nos pa nos haja un lugar mas altoe den cielo.

Bon Angelnan, koe awor ta completamente feliz den Dios, tin un

stimacion grandi pa Dios i pa hende. Nan no ta desea nada sino pa nos gana pa un bida birtuosa lugarnan den cielo, koe diabelnan a perde pa nan picar.

Dios a doena cada hende un Angel pa warda; es Angel jama: Angel-Wardador.

Di dia i anochi nos Angel-Wardador ta cerca nos. P'esai semper nos mester tin cuidao, di no haci nada, ni papia un palabra koe lo disgusté.

III.

Caida di promer hende.

Dios a cria e dos promer hende den inocencia i santidad, i a pone Adam i Eva den un hardin delicioso, koe jama Paraiso terrestre. Un rioe grandi tabata corre den es hardin.

Tabatin aja toer sorto di paloe boenita i nan fruta tabata dushi; nan por a come di toer fruta di paraiso, fuera di paloe di *conocementoe di bon i maloe*, koe tabata meimei di es hardin. Dios a bisa nan: „Boso por come di toer paloe di paraiso, fuera di paloe di *conocementoe di bon i maloe*; pasobra dia koe boso lo come di djé, boso lo moeri.” Nan mester cumpli coe es mandamientoe pa doena Dios prueba di nan amor, di nan fieldad i di nan obediencia. I Dios a menaza nan coe morto, si nan no cumpli coe su mandamiento.

Diabel a mirá, koe hende lo gana es bienaventuranza koe el a perde pa picar. Su odio contra Dios i codicia contra hende, a hacié tenta hende, pa nan perde bienaventuranza eterna. P'esai diabel a toema curpa di un colebra i a puntra Eva: „Pakiko Dios a taha boso di come di toer paloe di paraiso?” Anto Eva a respondé: „Nos ta come di toer paloe di fruta koe ta den paraiso; Dios a taha nos, di no come fruta di es paloe koe ta meimei di paraiso, i di no toké, pa nos no moeri.”

Colebra a contesta Eva: „Nó, lo boso no moeri, ma Dios sabi, koe dia boso lo come di es fruta, boso wowo lo abrí i lo boso ta manera Dios.”

Eva a keda mira es fruta tahá; i mas tantoe e tabata miré, tantoe mas gustoe e tabatin den

djé, te porfin el a cohe e fruta tahá i a comé ;
despues el a doené na Adam koe a comé també.

Diabel a haci un promesa mentirosa na Eva, koe ni e ni Adam lo moeri, ma koe nan lo bira igual na Dios. Koe nos no pone anto ningun fẽ den diabel i su promesanan. „Pasobra e ta un ganjador i tata mentiroso.”

IV.

Castigoe di promer hende.

Despues koe Adam i Eva a peca, nan a coeminza sinti remordimientoe i nan tabatin berguenza. Movimientoe di mas chikitoe di blatji a spanta nan.



I ora nan a tende boz di Senjor koe a jega cerca nan, nan tabatin miedoe i nan a sconde nan curpa den paloe nan dimondi. Ma Senjor a jama Adam i el a responde: „Mi a tende Bo boz den paraiso, i mi tabatin

miedoe i mi a bai sconde.” Anto Dios a tira na su cara, koe si e no a come di e fruta tahá, l'e no tabatin mester di a sconde su curpa. Ma Adam a tira culpa riba Eva, diciendo: „E muher, koe Bo a doena mi pa companjera, a doena mi di e fruta,

i mi a comé." I Senjor a bisa na e muher : „Pakiko bo a haci esai?" i e dici : „E colebra a ganja mi i mi a come." Anto Senjor a bisa colebra : „Pasobra bo a haci esai, bo ta maldicioná denter di toer animal riba tera ; lo bo lastra riba bo barica, i lo bo come tera toer dia di bo bida. Lo Mi pone enemistad denter di bo i muher ; l'e machica bo cabez."

E muher di kende Dios ta papia aki, ta Santísima Birgen Maria, koe cuater mil anja despues a bira Mama di Hesus, Salvador di mundoe.

Despues Dios a bisa Eva : „Lo Mi aumenta bo dolornan mas tantoe, i lo bo ta bao di poder di bo marí."

I na Adam Dios a bisa : „Tera sea maldicioná pa bo causa ; lo bo come di bo trabao toer dia di bo bida. Den sodor di bo frenta lo bo come bo pam, te dia lo bo bira tera trobe, di cual bo ta trahá ; pasobra stof bo ta, i lo bo bolbe trobé den stof."

Anto Dios a saca Adam i Eva for di e hoffi boenita, i a pone un angel coe spada di candela na porta di paraiso, i nan a perde nan inocencia i nan santidad ; nan curpa a bira mortal ; nan a keda sometido na muchoe sufrimentoe i miseria, i sobre esai Cieloe a keda cerá pa nan i nan descendiente. Ta es picar koe jama : *picar original*.

Nos toer a peca den Adam. Toer cos, koe nos ta sufri awor, no solamente na curpa, ma tambe na alma, ta consecuencia di picar original. Larga nos wanta toer es miseria di bida den spiritu di penitencia.

Caín, Abel i Seth

Adam i Eva a haja dos jioe. Un jama Caín, e otro Abel. Abel tabata wardador di carné i Cain coenukero. Toer dos tabata ofrece sacrificio na Dios: Cain di su cosecha, Abel di mehor di su bestia. Sacrificio di Cain a disgusta Dios, pasobra su obranan tabata maloe; ma El tabata gustoso den ofrenda di Abel, pasobra e tabata inocente i bon. I Dios a bendiciona Abel i su bestianan. P'esai Cain a hira codicioso i a haja rabia riba su roeman i den su odio ni su wowo el a hiza na cieloe.



Senjor a bisa Caín:
„Pakiko bo ta rabia?” i El a spierté di haci bon manera su roeman Abel, p’e tambe haja bendicion di cieloe.
Ma Caín

tabata surdo pa boz di Dios i el a traha un plan feroz.

Un dia el a combida Abel pa nan bai haci un keire na coenucoe i ora nan tabata sol, el a cohe Abel tené i a dal é mata.

Despues di a comete es delito asina horrible, Dios a jama Caín i dici: „Oenda Abel bo roeman ta?” Anto Caín a responde: „Mi no sâ; mi ta wardador di mi roeman anto?” I Dios a bisa Caín: „Kiko bo a haci? Boz di sanger di bo roeman ta sclama benganza na Mi; p'esai lo bo ta maldicioná riba tera, koe a abri su boca i a toema sanger di bo roeman for di bo manoe. Ora lo bo traha, tera lo no doena bo su fruta, i como bagamundo i huidor lo bo ta ariba mundoe.”

Na lugar di pidi Dios pordon humildemente, Caín a desespera i a sclama: „Mi picar ta muchoe grandi pa mi merece pordon.”

Es ora ai Caín a hui i leuw di Adam i Eva el a biba un bida desgraciada. Semper el tabatin miedoe i el tabata kere, koe toer hende kier a maté.

Dios a doena Adam un otro jioe koe jama Seth, na lugar di Abel; su descendientenan tambe tabata virtuoso i p'esai nan tabata jama nan *jioenan di Dios*. En particular por menta *Henoch*, koe Dios a kita biboe for di tera i *Methusalem* koe a biba 969 anja. Methusalem ta hende di mas bieuw, koe tabatin na mundoe. Adam a biba 930 anja.

Descendientenan di Caín tabata maloe i nan tabata carga number di *jioenan di hende*. Ora jioenan di Dios a coeminza frecuente jioenan di hende, temor pa Dios a coeminza disparte i immoralidad a bira general.

Warda bo di companía di mal amigo. Corda semper na jioenan di Dios i jioenan di hende. Kende koe ta hunga coe lodo, ta sucia su manoe.

Diluvio Universal.

A pasa cerca mil seis cien anja for di creacion di Adam, koe Dios a resolve di destrui mundoe pa un diluvio, pasobra bicio i maldad a bira asina general, koe Dios mes a manifesta su duele di a cria hende.

Denter di toer hende koe tabata biba es tempoe, i nan número tabata inmenso, Noë sol, un homber hustoe, i su muher i su jioenan a haja gracia cerca Dios. Dios a manda Noë traha un arca, está, un barcoe grandi coe tres piso, 300 bara largoe, 50 anchoe i 30 altoe. Noë a traha cien anja riba es arca, i duranti toer es tempoe el tabata spierta hende pa nan haci penitencia; ma nan no kier a comberti.

Ora Noë a caba e arca, Dios a bisé: „Drenta abo i toer di bo cas den arca; pasobra Mi ta



haja bo husto den e generacion aki." Despues Dios a bisé koe el mester toema di toer animal siete ó dos par, manera tabatin mester pa nan crianza i El dici: „Despues di siete dia lo Mi larga awa cai riba tera cuarente dia i cuarenta anochi." Noë a cumpli coe palabra di Dios, i Dios mes a cera porta di arca.

Despues di siete dia nubianan a abri i un awa-ceroe terribel a cai riba mundoe cuarenta dia i cuarenta anochi largoe. Awa a tapa henter tera



i a subi 15 bara riba ceroe di mas altoe. Toer hende i toer animal koe no tabata den arca huntoe coe Noë a hoga den diluvio; awa a keda para 150 dia riba mundoe.

Es ora ai Dios a manda un biento duroe pa seca tera. Arca a fica para riba un ceroe mashá

altoa, jamá Ararat, i nan por a bolbe mira ca-beznan di ceroe.

Cuarenta dia despues Noë a manda un raaf for di arca, pa mira si tera ta secoe caba, ma e páhara no a bolbe. Despues el a manda un paloma koe a bolbe unbez, pasobra é no tabatin camina di para. Siete dia despues el a bolbe manda un paloma, koe a bolbe coe un taki berde di olijfi den su boca. Aki for Noë a haja sabi, koe tera a coeminza bira secoe, ma sin embargo el a warda ainda siete dia i a manda un paloma atrobe, koe no a bolbe mas, pasobra awor tera tabata secoe.

Awor pa orden di Dios Noë a sali for di arca coe su familia i coe toer e animalnan, i el a



traha un altar na pia di ceroe i a ofrece na Dios un sacrificio na accion di gracias.

E sacrificio a gusta na Dios, asina koe El a priminti di no destrui mundoe nunca mas pa un tal diluvio; i como sinjal di e promesa dibina, El a doena na cieloe e arco boenita, koe nos ta mira tantoe bez na cieloe, ora solo ta manda su rayonan den gotanan di un awaceroe.

Den diluvio Dios ta moenstra na un manera spantosa su husticia severa i su odio pa picar. Ma muchoe mas terribel lo ta e huicio general na fin di mundoe.

Arca di Noë ta un imagen di Santa Iglesia. Ningun hende por ta feliz for di arca. Arca tin un entrada sol; Iglesia tambe tin ún entrada sol, esta, Santo Bautismo. Manera arca tabata subi mas i mas altoe, segun koe awa a subi, asina tambe persecusionnan mester subi, pa alza i glorifica Santa Iglesia mas tantoe.

VII.

1. Jioenan di Noe. 2. Toren di Babel.

1. E tres jioe di Noë: Sem, Cham i Jafet a bolbe pobla mundoe coe nan generacion poco-poco. Noë a coeminza traha coenucoe i a planta paloe di dreifi, di cual el a traha binja. No conociendo forza di e bebida el a bebe te bira boerachi, despues el a cai droemi sin tapa su curpa bon. Su jioe Cham, mirando su tata den tal estado, a bofon di djé i a coeri bai cerca su roemanan, i a conta nan bao di harimentoe, com el a mira Noë. Ma Sem i Jafet a moenstra nan indigná di un tal trato i nan a bai cerca nan tata i a tapé coe un mantel.

Ora Noë a spierta i koe el a tende, koe Cham a bofon di djé, ma koe Sem i Jafet a comporta nan asina bon, el a bendiciona es dos bon jioe, ma el a maldiciona descendiente di Cham.

Noë a biba hopi tem mas despues di diluvio i a moeri na edad di 950 anja.



2. Despues di diluvio hende a multiplica na un manera extraordinario. Nan número grandi a obliga nan di separa for di otro; ma promer koe nan parti for di otro, nan kier a haci nan nomber célebre i traha un toren di tal altura, koe su cabez lo jega te na cieloe.

Ma es soberbia a disgusta Dios; p'esai Dios a bruha nan lenga di tal manera, koe ni un por a comprende otro mas. Nan a haja nan obligá anto pa stop es trabao koe nan a coeminza i nan a plama for di otro.

Desendentenan di Sem a keda na Asia; esnan di Cham a bai Africa i esnan di Jafet a dirigi nan na Europa.

Es toren i es ciudad aicerca a haja despues number di *Babel of Babylon*, koe ta nifica: bruhamentoe.

Den di cuater mandamiento Dios a bisa: honra bo tata i bo mama, pa bo tin bida largoe na mundoe. Dios lo bendiciona muchanan koe ta sigui ehempel di Sam i Jafet; ma alcontrario l'E castiga nan koe no ta respeta nan.

VIII.

1. Vocacion di Abraham.
2. Lucha i Victoria.
3. Melchisedech.

1. Despues di diluvio hendenan a bolbe cai di un malicia na otro. Nan a loebida conocementoe di un solo Dios berdadero i a adora solo, luna i streanan, hende i animal, si, hasta paloe i piedra.

Na tera di Haran tambe, camina Abraham tabata biba, idolatría tabata general. P'esai Dios a manda Abraham bandona su patria i bai na un tera koe l'E moenstré.

Abraham a obedece mes ora i el a bai coe su muher Sara i su sobrino Lot na tera di Canaän. E tempoe e tabatin 75 anja.

Dios a priminti Abraham koe l'E doené tera di Canaän pa su herencia, i koe lé tin un descendencia grandi, koe Mesias lo nacé for di djé. Ta asina Dios a bisa Abraham:

„Lo Mi haci bo bira un pueblo grandi i lo Mi

bendiciona bo i lo Mi haci bo nomber grandi i lo bo ta bendicioná. Lo Mi bendiciona nan koe lo papia bon di bo, i lo Mi maldiciona nan koe lo papia maloe di bo, i *den bo* toer generacion di tera lo ta bendicioná.”

Abraham tabata mashá ricoe na oro i plata, na carner i baca, na criar homber i muher. Su sobri- no Lot tambe tabata ricoe. Hopi bez a socede, koe wardadornan di bestia di Abraham a haja pleitoe coe esnan di Lot riba tereno di mas bon. Ora Abraham a tende esai, el a bisa Lot: „Koe no tin pleitoe denter mi i bo i denter mi warda- dornan i bo wardadornan, ya koe nos ta roeman. Mira, henter mundoe ta bo dilanti; mi ta pidi bo bai for di mi; si lo bo bai na banda robez, lo mi bai na banda drechi; si lo bo scohe banda drechi, lo mi bai na banda robez.”

Lot a scohe e partida boenita banda di Jordaan i a toema su bibar den ciudad Sodoma.

2. Mientras Lot tabata ai, a bini cuater rey i nan a haci gera contra rey di Sodoma. Nan a batié, a podera di ciudad, a destrui toer cos i a cohe habitantenan preso; Lot tambe tabata den número di presonan. Abraham a hanja noticia di es des- gracia. Mes ora el a arma toer su criarnan, el a bai purá tras di e brigánnan, el a cohe nan, el a bati nan te nan a hui i el a libra su sobrino Lot i toer e otro prisonjeronan, mientras el a podera di toer loke e reynan a horta.

Abraham a doena libertad na e presonan i el a doena na cada donjo loke tabata di nan; el no a toema nada p'e mes.

3. Ora Abraham a regresa, Melchisedech, koe tabata rey i sacerdote, a bin contré. Melchisedech a ofrece na Dios un ofrenda di pam i binja na

accion di gracias p'es victoria i Abraham a doené un décima parti di toer cos, pasobra el tabata sacerdote di Altísimo.



Melchisedech, rey i sacerdote, tabata un figura di Cristoe, koe ta rey i sacerdote tambe. Ofrenda di Melchisedech, koe tabata consisti di pam i binja, tabata un profecia di Santoe Sacrificio di Misa, den cual Hesus ta ofrece su mes bao di figura di pam i binja na su Tata celestial.

IX.

1. Tres angel ta bishita Abraham.

2. Destruccion di Sodoma.

1. Un dia koe Abraham tabata sintando dilanti porta di su tent, den sombra di un paloe, tres homber a camna jega cerca djé. El a lamanta bai contra nan i el a pidi nan di sosega un poco cer-

ca djé. E no tabata sabi, koe e tres homber tabata Angel.

Abraham a ricibi es tres stranjero asina bon koe e tabata por. El a corre bisa su muher Sara di traha liher koeki di mehor harinja. El mes a scohe un bon bicer, koe el a doena na un criar pa dreché, mientras el a presenta nan lechi i manteca.

Promer koe nan kier a sigui bai mas aleuw, un di nan a priminti Abraham, koe su muher lo pari un jioe homber.

Ora el a companja nan un bon pida camina pa bai Sodoma, e di mas principal djé tres stranjero, jamá *Senjor*, a revelé, koe Sodoma i teranan rondó di djé lo ta destruí pa motiboe di nan picar.

Abraham a pidi Senjor pordon pa habitantenan di Sodoma i dici: „Si tin 50 hende hustoe den e ciudad, lo nan perde nan bida huntoe coe e otro nan i lo Bo no spaar e lugar-ai pa motiboe di e cincuenta hustoe?” I Dios a responde, koe l'E spaar e ciudad, si tin 50 hende hustoe numá. Ma Abraham tabata teme, koe lo no tin cincuenta hende hustoe den e ciudad, i el a bolbe bisa: „Si tin cinco hende hustoe menos koe cincuenta, anto lo Bo destrui henter ciudad?” I Senjor a responde: „Si Mi haja 45 hende hustoe ai, lo Mi no destrui e ciudad.”

Ma Abraham, jen di confianza riba bondad di Dios, a sigui baha; di 45 na 40, di 40 na 30, di 30 na 20 i porfin te diez. I Senjor a responde: „Pa motiboe di es diez hende, lo Mi no destruíé.” Ma no tabatin diez hende hustoe den Sodoma.

2. Banda di atardi e tres Angel a jega Sodoma, i nan a baha na cas di Lot. Apena e habitantenan impío a tende e noticia, nan kier a obli-

ga Lot, pa Lot entrega nan es Angelnan, pa nan maltrata nan. Ora Lot a nenga, nan kier a forza porta kibra; ma e Angelnan a haci nan ciegoe, asina koe nan no por a haja porta.

Es ora ai es Angelnan a bisa Lot: „Sali coe toer bo hendenan for di es ciudad, pasobra lo nos destruíé.” I pasobra el a tarda, nan a saca Lot coe su muher i su dos jioe p'afor di ciudad i



a spierta nan, di salba nan curpa i di no mira p'atras. Mes ora Dios Senjor a largacandela i suafel jobe riba Sodomoma i Gomora. Toer es

dos ciudad tabata completamente destruí i na es lugar a sali un lagun grandi di awa saloe, jamá *Lamar Morto*.

Muher di Lot a mira p'atras contra orde di Dios, i pa su castigoe el a troca na un columna di saloe.

Muchoe bez Dios sâ spaar mal hende pa via di bon hende. Si tabatin diez hende hustoe den e ciudad, anto Dios lo no a destruíé. Ta terribel pa cai den manoe di Dios biboe.

I. Obediencia di Abraham. 2 Sacrificio di Isaac.

1. Segun promesa di Dios na Abraham, El a doené un jioe, jamá Isaác, koe dia pa dia a bira mas gustoso cerca hende.

Grandi, mashá grandi tabata prueba di amor i di obediencia, koe Dios lo exigí awor di Abraham.

Un dia Senjor a jamé i dici: „Toema bo único jioe Isaác, koe bo ta stima, bai coen'é i lo bo ofrecé como sacrificio riba un di ceroenan koe lo Mi moenstra bo.”

Abraham a obedece mes ora; el a sia su buricoe i e coe su jioe i dos criar a cohe camina. Despues di tres dia nan a jega *Moria*; aki Abraham a larga e dos criar; el a pone paloe pa sacrificio riba schouder di su jioe, i e mes a carga candela i spada.

Ora nan tabata bai, Isaác a bisa su tata: „Mi tata”. I el a respondé: „Kiko bo kier, mi jioe?” „Mira tata,” e dici, „ata candela i paloe, ma oenda ta e víctima pa sacrificio?” Abraham dici: „Mi jioe, Dios lo percura pa victima di sacrificio.” I toer dos a subi ceroe.

2. Ora nan a jega na e lugar, koe Dios a bisa Abraham di bai pa ofrece e sacrificio, Abraham a traha un altar, el a pone paloe ariba, el a mara Isaác i el a poné riba paloe como sacrificio.

Es ora ai Isaác a comprende toer cos i el a someté na santa boluntad di Dios. Abraham a cohe cuchioe i a hiza su manoe na laria pa mata su jioe.



Ata! mes ora un boz ta sona tor di cieloe:
 „Abraham, Abraham! no haci e mucha maloe,
 pasobra awor Mi ta mira koe bo ta teme Senjor
 i bo no a spaar bo único jioe pa Mi motiboe.”

Mientras Abraham a los su jioe, el a mira un
 chubatoe, pegá coe su cachoe den lama. El a
 cohé i sacrifické na lugar di su jioe.

Dios a haja un gustoe grandi den e obediencia
 extraordinaria di Abraham i dici: „Pasobra bo a
 haci esai, lo Mi haci bo generacion numerosa ma-
 nera streanan di cieloe i toer generacion di mun-
 doe lo ta bendicioná den bo DESCENDIENTE (está:
 den Hesu-Cristoe)”.

Abraham a bolbe bai cas contentoe coe su jioe
 i su dos criar.

Abraham ta sinja nos, koe nos mester sacrifica toer cos, hasta cos di mas stimá koe nos tin, si Dios ta exigi esai di nos. Sacrificio di Isaác ta imagen di mas grandi di sacrificio di Cruz. Cristoe tambe tabata jioe stimá di Tata celestial. Cristoe tambe a sacrifica su mes riba Cruz; E mes a carga paloe di Cruz riba su schouder; El a larga uan clabé riba djé boluntariamente.

XI.

I. Casamentoe di Isaac i Rebecca. 2. Esaú i Jacob

1. Sara, mama di Isaac a moeri na edad di 127 anja. Despues di su morto Abraham a manda un criar di mas bieuw, jamá Eliëzer, na es tera, camina e ta bata biba promer, pa busca ai un esposa piadosa pa su jioe.

Eliëzer a bai coe hopi regalo ricoe pa e moza, koe l'e scohe pa Isaác.

Solo tabata cerca di drenta, ora el a jega na e tera, koe jama Mesopotamia.

I el a bai sinta sosega un poco cerca un poz, oenda muhernan tabata bini saca awa. Mes ora un moza, jamá Rebecca, cargando un boetishi, a jega pa saca awa. Eliëzer a bai cerca djé i dici: „Doena mi poco awa pa mi bebe”. Un bez Rebecca a doené awa i a bisa: „Bebe, mi shon!” I ora el a bébe, Rebecca a bacia awa tambe pa toer bestia di Eliëzer. Es ora ai Eliëzer a conoce koe ta e koe Dios a destina como esposa pa Isaác. I el a saca prendanan precioso di oro, i a ofrece nan na Rebecca.

Rebecca a corre bai conta su mama toer e cos ai. Ora su roeman Laban a tende e cos ai i koe el a mira toer e prenda, el a bai contra Eliëzer i a combidé pa pasa anochi den cas di su tata.

Eliëzer a bai coen'é, ma promer di come, e kier a cumpli coe su encargo i el a bisa, koe el a bini pa busca Rebecca como esposa pa Isaác.

Nan dici coen'é: „Ata Rebecca, toemé i bai coen'é.”

E ora ai Eliëzer a saca hopi cos di oro, di plata i bistirnan boenita i a presenta nan na Rebecca i su roemanan i su mama.

I nan a haci fiesta i su manece su tata i mama i roeman e bendiciona Rebecca, i el a bai coe Eliëzer i a bira esposa di Isaác.

Ora Abraham tabatin 175 anja, el a doena su jioe toer loke el tabata posede i el a moeri.

Isaác a deré banda di su mama Sara.

2. Despues di 20 anja Dios a scucha oracion di su sirbidor Isaác i Dios a doené dos jioe: Esaú i Jacob.

Esaú, jioe mayor, su curpa tabata toer na ca-bei manera lana di animal; e tabatin un caracter brutoe i e tabata un jaagdó balente. Jacob alcontrario tabata suave i gracioso i wardador di carner.

Un dia koe Jacob tabata coeshina papa, Esaú a jega di jaagmento i el a bisa: „Doena mi e papa ai koe bo a coeshina, pasobra mi a bini ma-shá cansá di camina.” Jacob a respondé: „Bende mi bo derecho di jioe mayor.” Anto el a bisa: „Mira, mi ta moeri, ki probecho mi tin koe mi a nace promer?” Jacob dici: „Hura mi anto”. Esaú a hura i a bende su derecho di jioe mayor.

Asina Esaú, forzá pa hamber, a bende su derecho koe promer jioe tabatin riba herencia i bendicion di nan tata, pa un tajor di papa; ma ora Esaú a pensé despues, el a conoce su falta, a bira rabiá i el a menaza su roeman coe morto. Ora

Isaïc a bira bieuw i ciegoe, e kier a doena su jioe Esaú su bendicion paternal, promer di moeri. El a jama Esaú cerca djé i dici: „Bo ta mira, koe mi ta bira bieuw i koe mi no sâ dia di mi morto. Toema bo arma i bai jaag; i ora bo haja algo di jaagmentoe, coeshina un coeminda pa mi, manera bo sâ koe mi gusta, i trecé pa mi comé i lo mi bendiciona bo promer mi moeri”.

Rebecca a tende esai. Asina Esaú a bai, el a mata dos lamtji i el a drecha nan na moda di coeminda di mondi. Jacob a bisti di mehor bistir di Esaú, el a tapa su garganta i manoenan coe cueroe di cabritoe i el a bai coe e coeminda coeshiná cerca su tata. Isaïc a puntra: „Kende bo ta?” Jacob a responde: „Mi ta Esaú bo jioe mayor; m'a haci manera bo a manda mi; lamanta, sinta i come di es koe mi a cohe, pa bo alma bendiciona mi.”

Isaïc a responde: „Bini cerca mi pa mi foela bo, mi jioe”. E cueroe di cabritoe a hinca Isaïc den error, pasobra Esaú su cueroe tabata jen di cabeí.

El a kere koe ta Esaú tabata su dilanti i el a doené su bendicion.

Ora Esaú a jega cas i koe el a tende com Jacob a horta su bendicion paternal, el a coeminza jora amargamente i el a resolve di mata Jacob, asina su tata moeri.

Rebecca, temiendo pa bida di su jioe stimá Jacob, dici coen'é: „Mira, bo roeman Esaú ta menaza bo pa mata; bai anto cerca mi roeman Laban na Haran i keda biba aja algun dia, te ora rabia di bo roeman a baha.”

Jacob a toema despedida di su mayor, i el a bai Mesopotamia.

Un anochi koe Jacob tabata cansá di camina, el




a cai droemi riba un piedra; den sonjo el a mira un trapi, koe su punta tabata jega te na cielo.

Angelnan a subi i baha i Dios mes tabata riba e trapi di mas ariba. Dios a repeti e promesanan,

koe El a jega di haci coe su tatanan Abraham i Isaác: „Mi ta Senjor, Dios di Abraham, bo tata, i Dios di Isaác; e tera, koe bo ta droemi ariba, lo Mi doena bo i bo jioenan. Bo descendientenan lo ta manera stof di tera, lo bo plama na Oost i na West, na Noord i na Zuid i den di bo i bo descendiente toer nacion di tera lo ta bendicioná”.

Ora Jacob a spierta, e dici jen di respet: „Di berdad, Senjor ta na es lugar aki, i mi no a sabi esai”. Jacob a bolter e piedra, koe el a boeta su cabez ariba, el a bacia azeta riba djé i el a jama es lugar *Bethel*, esta, *cas di Dios*.

Esaú a bende su derecho di jioe mayor pa un tajor di papa; mescos tambe esnan koe ta haci un picar mortal ta bende nan derecho riba cielo boenita pa un deseo maloe di un momento. Larga nos corda semper: Kiko ta sirbi hende di a gana henter mundoe, si su alma ta sufri danjo.



Jacob na Mesopotamia.

Ora Jacob a jega Mesopotamia, su tio Laban a ricibié coe carinjo. Laban a confié pa warda e numeroso tao di carner koe, dia pa dia tabata bira mas grandi.

Ma con toer koe Jacob a sirbi Laban coe zelo i fieldad, e tabatin di sufri hopi pa culpa di su tio avaro; el a hajé obligá anto di keda na su sirbishi siete anja p'é casa coe Raguel i despues seis anja mas, promer koe el a bai cas di su tata. Pa bendicion particular di Dios Jacob a bira mashá ricoe.

Jacob a ripara, koe Laban no tabata mira su rikeza coe bon wowo. P'esai Dios a doené orden pa bolbe bai na Canaän.

A socede koe Laban tabata ausente algun dia for di cas. Jacob a bai ketoe-ketoe coe su esposa, su jioenan i coe toer su posesion. Conforme Laban a tende esai, el a poersiguié i a cohé; ma Dios a tahé di no mishi coe Jacob. Nan a bandona otro na paz i Jacob a sigui su biaha.

Poco-poco Jacob a jega Canaän. El a manda hende p'adilanti pa nuncia Esaú su regreso i tambe pa pidié su amistad.

E sirbientenan a bini coe respondi:

„Nos a bai na Esaú i mira, el ta bini purá bin contra bo coe 400 homber.”

Ora Jacob a tende e nobo, el a spanta, el a pidi Dios su judanza i el a manda hende p'adilanti coe present mashá ricoe pa placa rabia di su roeman. Ora di dia a abri el a mira Esaú ta bini coe 400 homber. Jacob a camna contré.

Asina Jacob a miré, Jacob a baha su cabez siete bez te na suela.

Esau, calmá pa es hechoe di Jacob, a jega cerca djé, el a brazé i el a zoentjé jorando di sintimentoe. El a nenga e regalonan tambe, diciendo: „Mi roeman, mi mes tin hopi, keda coe bo propiedad.”

Ma Jacob a sigui persisti asina tantoe, te porfin Esau a acepta e regalonan.

Jacob a drenta su patria jen di rikeza i bendicion; el a braza su tata anciano Isaác, koe a biba 13 anja ainda despues di regreso di Jacob. El a moeri na edad di 180 anja i su dos jioe Ezaú i Jacob a deré.

Jacob dex toer su pena a toema su refugio cerca Dios. Koe nos coestumbra di haci esai tambe den toer peligro di alma i di curpa.

XIII.

1. Jioenan di Jacob. 2. Roemannau di Jozef ta bendé.

1. Jacob tabatin 12 jioe homber. E mayor jama Ruben, e di mas chikitoe Benjamin i mayor di Benjamin Josef.

Josef tabatin 16 anja i e tabata warda bestia huntoe coe su roemannan. E tabata un mashá bon mucha, p'esai su tata a doené boenita bistir di diferente color. P'es motiboe su roemannan tabatin odio contra djé, i tambe pasobra el a conta su tata, ki crimen grandi su roemannan perverso a comete.

Es odio a crece mas tantoe pa dos sonjo koe

Josef a conta nan. El a bisa nan, koe den su sonjo a figuré, koe el i su roemannan tabata mara maishi na coenucoe i koe su boshi a keda para net i koe boshinan di su roemannan a baha nan cabez pa su boshi te na suela.

Den un otro sonjo el a mira solo, luna i diez strea tabata adoré. Es ora ai su roemannan a grita: „Lo bo ta nos rey? ó lo nos para bao di bo mando?”

Porfin odio djé roemannan a crece asina tantoe, koe nan a resolve pa mata Josef.

2. Un dia Jacob a manda Josef na coenucoe, camina su roemannan tabata warda bestia, p'e trece noticia com nan a pasa. Su roemannan a miré di aleuw i nan a bisa otro: „Mira nos sonjador ta bini: bam, larga nos maté i tiré den e poz: i lo nos bisa: un bestia feroso a maté, i anto lo nos mira, ki probecho su sonjonan a doené.”

Ma Ruben a trata pa kita e idea atroz for di nan cabez i dici: „No maté, no drama su sanger; ma tiré den e poz ai koe ta den mondi i boso mân lo keda sin mancha.” Ruben tabatin idea di saca Josef despues for di es poz pa mandé trobe cerca su tata.

E otro roemannan a fica contentoe coe esai; nan a kita Josef su bistir boenita i a tiré den e poz. Despues Ruben a bai i e otronan a sinta pa nan come.

Mientra nan tabata sinta ai, a pasa algun comerciante koe tabata bai Egipto. Huda dici: „Ki probecho nos tin, si nos mata nos roeman. Mehior nos bendé coe Ismaelitanan i nos no mancha nos mân; pasobra e ta nos roeman i nos sanger.”

Nan a saca Josef for di poz i a bendé pa catiboe



pa 20 placa di plata. Despues nan a kibra su bistir boenita, a moehé den sanger di un cabritoe i a mandé pa nan tata coe siguiente respondi: „Mira si esaki no ta bistir di bo jioe.” Su tata a reconocé mes ora i a sclama: „Esaki ta bistir di mi jioe, un bestia feroz a devoré.” I e tabata desconsolado pa pierde di su jioe stimá.

E comerciantenan a hiba Josef na Egipto i a bendé aja coe un homber di consideracion, jamá Pútifar. Despues di algun tempoe Pútifar a confié coe gobierno di su cas, pasobra Josef tabata sabir i honrado.

Ma muher di Pútifar tabata un mal hende i e kier a hinca Josef den picar; ma Josef, cordando na presencia di Dios, dici: „Com mi por haci un cos maloe i peca contra mi Dios?”

Un dia e muher a cohe Josef tene, ma Josef

a larga su mantel den su mân i a hui bai. Es mal muher a acusa Josef falsamente i nan a ceré inocente den prison.

Ora nan a tenta Josef pa haci maloe, e dici: „Com mi por haci es maloe i peca contra Dios?” Mescos nos tambe mester bisa.

No tin nada na mundoe pa preciosa koe e ta, koe por ta compará eoe baloi di un alma puro i inocente.

XIV.

1. Josef den prison. 2. Su salvacion.

1. Dios a haci, koe e cipier di prison a stima Josef mashá; no solamente el tabata traté eoe mashá carinjo, ma el a doené tambe mando riba otro prisonjeronan.

Den e prison tabatin tambe mayordomo i panadero di rey.

Un dia koe nan tabata mashá tristoe pa un sonjo, koe nan a sonja, Josef dici: „Conta mi es koe boso a sonja.”

Es ora e gran mayordomo a bisa:

„Mi a mira mi dilanti di un paloe di druifi koe tabatin tres rama. E paloe a crece, el a bira berde, florece, i porfin el a doena druifi hechoe; i mi tabatin beker di Pharao den mi man, i mi a toema e druifinan i a primi nan awa den beker i a doené despues na Pharao.”

Josef a contesta: „E tres rama ta nifica tres dia. Despues di tres dia Pharao lo corda riba bo i l'e pone bo na bo puesto di promer. Mi

ta pidi bo koe ora lo bo ta feliz atrobe, corda anto riba mi i sea mi protector cerca rey, p'e libra mi for di e prison aki; pasobra nan a horta mi for di tera di Hebreonan i cera mi inocente den prison.'

Despues e panadero mayor a conta su sonjo i dici: „Mi tabata carga tres macutoe; den e macutoe di mas ariba tabatin toer sorto di cos dushi i páharanan di cieloe a bin come nan.”

Josef a respondé: „E tres macutoe ta tres dia. Despues di tres dia Pharao lo larga horca bo i páharanan di cieloe lo come bo carni.”

E sonjonan a realiza manera Josef a bisa p'adilanti. Ma dia e gran mayordomo a haja su libertad, e no tabata corda mas riba Josef.

2. Dos anja despues Pharao mes tabatin dos sonjo koe ningun di su sabir i splicadornan di sonjo por a splica. Es ora ai e gran mayordomo a corda riba Josef; el a conta rey loke a pasé i mes ora rey a doena orde pa saca Josef for di prison i pa trecé cerca djé.

Es ora rey a conta Josef su sonjo i dici: „Mi tabata para na orilja di rioe i siete baca a sali for di rioe, baca mashá boenita i gordo, koe a keda come jerba na orilja. I ata, despues a bini otro siete baca mashá mahós i terribel flacoe, manera nunca mi a mira den tera di Egipto i nan a mata i come e di promernan sin bira gordo.”

Den e otro sonjo rey ta conta, koe el a mira siete tapoeshi di maishi jen i boenita; despues a sali siete tapoeshi bashí i nan a guli e siete tapoeshi jen.

Josef a responde: „Den es sonjo Dios ta moenstra rey loke Dios a propone di haci.” Anto el a papia coe Pharao: „E siete baca gordo i siete

tapoeshi jen ta nifica siete anja di abundancia; e siete baca flacoe i siete tapoeshi secoe ta nifica siete anja di hamber i di es manera nan lo sigui otro: mira, lo bini siete anja di cosecha abundante den henter tera di Egipto; despues lo bini siete anja di segura, asina completa, koe e abundancia di coeminda koe a bini promer lo ta toer gastá i koe lo no corda mas riba djé."

Josef a conseha rey di pone un homber sabir pa recohe toer cos den anjanan di abundancia i warda nan pa tempoe di miseria. Pharao a gusta es conseho i el a pone Josef pa vice-rey di Egipto i caba el a hinca su ringtji na Josef su dede i a cologa un cadena di oro na su garganta. Tambe el a troca su number i a jamé: *Salbador di mundoe*.

Historia di Josef ta sinja nos pa confia semper riba Dios i pa nunca nos ta malcontentoe ora cualkier desgracia ta pasa nos. Mucha bez Dios ta usa e desgracia pa un medio pa trece nos despues na un felicidad grandi. Si Josef no tabata bendí como catiboe i cerá na prison, anto probablemente nunca lo el a bira vice-rey di Egipto. Bon Dios ta dispone toer cos na favor di esnan koe ta stimé.

XV.

Promer biaha di roeminnan di Josef na Egipto.

Den e siete anja di abundancia Josef a larga coempra toer trigo, koe el por a haja na toer camina i el a warda nan.

Awor a sigui e siete anja di segura i tabatin miseria i hamber. Jioenan di Egipto a bai cerca rey i a pidié pam. El a responde nan: „Bai cerca Josef i haci loke l'e bisa boso.”

Na tera di Canaän tambe tabatin hamber. Jacob a tende koe na Egipto tabatin abundancia di trigo; p'esai el a bisa su jioenan: „Bai Egipto, bai coempra loke nos mester.”

Asina nan a mira Josef, nan a baha cabez te na suela p'é. Josef a reconoce nan mes ora i a corda na e sonjo koe tabata cumpli awor.

Ma promer koe el a haci nan sabi, kende e tabata, e kier a poerba su roeminnan, p'e mira si nan a bira bon hende. El a papia severamente coe nan i a puntra nan. „Di oenda boso ta bini?” Su roeminnan a respondé: „Di tera di Canaän pa coempra coeminda necesario”. Josef a bolbe bisa: „Boso ta spion.” Mashá spantá e roeminnan a responde: „No Senjor, bo sirbidornan a bin coempra trigo. Nos toer ta jioe di e mes un tata koe ta biba na Canaän. Nos tabata diez dos roeman, e di mas chikitoe a keda cerca nos tata, e otro a moeri.”

Ki legria pa Josef di tende, koe su tata i Benjamin tabata na bida ainda.

El a bisa nan: „Lo mi mira si boso ta papia berdad” i el a cera nan toer den prison.

Tres dia despues el a larga saca nan atrobe

i trece nan su dilanti. El a pone Simeon na cadena i a bolbe ceré na prison; e otronan por a bai cas, pa busca nan roeman di mas chikitoe. Es ora ai nan a recorda nan, ki sin misericordia nan a trata Josef antes.

Josef a larga jena nan sacoe coe trigo, i den cada sacoe el a larga pone e placa, koe nan a trece. Asina nan a jega cas, nan a conta nan ta toer cos koe a pasa nan na Egipto.

Ora nan a basha trigonan for di sacoe, nan a bolbe haja toer nan placa, loke a admira nan mashá. Isaác tendiendo koe e vice-rey kier mira Benjamin, a bira mashá tristoe.

„Bai na Josef.” Pharaó a bisa Egipcionan. „Bai na Josef, tata wardador di Niño Hesus”, Santa Iglesia ta bisa nos tambe.

E por, l'é juda nos, si nos ta pidié coe confianza. San José ta patrono di toer hende i principalmente un protector di hubentud.

XVI.

1. Segunda biaha di roemanningan di Josef na Egipto.

2. Josef ta hacié conocí.

1. Algun luna a pasa i casi toer trigo koe nan a coempra a caba. Jacob a bisa su jioenan: „Bai atrobe i coempra un poco coeminda pa nos.” Ma nan a respondé: „E homber a bisa nos bao di huramentoe, diciendo: „lo boso no mira mi cara mas, si boso no trece boso roeman chikitoe.” Contra su gustoe Jacob a larga Benjamin bai porfin coe nan.

Conforme e roemannan a jega Egipto, Josef a larga drecha un comementoe pa nan. Un mayordomo a hiba nan palacio i Simeon a bolbe bini cerca nan. Ora Josef a drenta, nan a baha nan cabez p'e i a ofrece nan regalo. El a papia ma-shá amistoso coe nan i dici:

„Boso tata bieuw, koe boso a papia di djé, e ta bon di salud? E ta na biba ainda?” I mirando Benjamin, Josef dici: „Esaki ta boso roeman chikito, koe boso a papia coe mi di djé?” I papian-do coe Benjamin, el a bisa: „Mi jioe, koe Dios tene misericordia coe bo.” El no por a papia ni un palabra mas; su coerazon tabata jen. El a sali for di sala i a jora; un rato atrás el a bolbe bini.

El a moenstra Benjamin mas honor koe su roemannan. Nan a ripara esai, ma nan no a bira codishi.

Nan toer a come i bebe, i tabata contentoe.

Despues di comementoe, Josef a larga e mayordomo jena nan sacoe coe trigo, huntoe coe nan placa, koe nan a paga. El a mandé pa sconde su beker di plata den sacoe di Benjamin.

Su manece nan a bai.

Apena e roemannan tabata un poco leuw for di ciudad, koe Josef a manda su mayordomo coe algun cabaljero nan tras, pa acusa nan di hortamento. E mayordomo a cohe nan i dici: „Pakiko boso ta paga bon coe maloe? E beker, koe boso a horta, ta di mi Senjor.”

Coe indignacion nan a responde: „Esun, koe bo haja coe e beker, lo moeri, i nos toer lo keda catiboe di bo Senjor.”

Mes ora nan a abri nan sacoe pa e mayordomo ristra nan. El a coeminza coe sacoe di e

mayor, té na esun di mas chikitoe; i ata, ora nan a sagudi sacoe di Benjamin, nan a haja e beker.

Toer a keda spantá i a bira sustá; nan a ranca nan panja kibra di tristeza i sin papia un palabra nan a bolbe bai ciudad. Josef a haci manera e ta mashá rabiá i dici: „Pakiko boso a haci e cos ai?” Nan a respondé: „Kiko nos por bisa? Dios a haja un malicia den nos; nos toer ta keda catiboe di nos Senjor.” Josef dici: „Nó, esun koe a horta mi beker, ta keda mi catiboe; ma boso por bolbe bai liber cas di boso tata.”

Huda a jega awor un poco mas acerca i a papia: „Mi Senjor, mi ta pidi bo, larga bo sirbidor papia un palabra coe bo, i no rabia coe bo sirbidor; pasobra despues di Pharao bo ta mi Senjor. E promer bez bo a puntra bo sirbidornan: „boso tin un tata ó un roeman?” I nos a responde bo: „Senjor, nos tin un tata bieuw i un roeman mas chikitoe, koe nos tata den su edad altoe a haja, i koe su roeman di tata i di mama a moeri; e ta único jioe di su mama, i su tata ta stimé mashá.” Anto bo a bisa na bo sirbidornan: „Trecé cerca mi pa mi wowo sosega ariba djé.” Nos a responde nos Senjor: „E hoben no por bandona su tata; si l'e bandoné, su tata lo moeri.” Ma bo a bisa bo sirbidornan: „Si boso roeman chikitoe no bini coe boso, boso lo no mira mi cara mas.” Ora nos a bolbe despues cerca bo sirbidor, nos a bisa nos tata toer cos koe nos Senjor a papia. Nos tata a bisa nos despues bai trobe i coempra un poco trigo mas. Ma nos a responde: „Nos no por bai; si nos roeman di mas chikitoe bai coe nos, lo nos bai toer huntoe; sino, nos no ta risca di mira cara di es homber.” Anto nos tata

a responde: „Boso sabi koe mi esposa a doena mi dos jioe homber. Un a bai i boso a bisa: un bestia feroz a maté; i te ainda e no a bolbe. Si boso hiba awor esaki tambe i cualkier desgracia companjé na camina, anto coe duele boso lo larga mi cabeí blancoe baha den graf. Si awor mi bolbe cerca nos tata sin e mucha, sigur l'e moeri di tristeza, pasobra su alma ta muchoe pegá n'e. Mi a keda responsable pa e mucha; p'esai mi ta keda bo catiboe, ma larga e mucha bolbe coe su roemannan.”



2. Es ora ai Josef no por a resisti mas; el a coeminsa jora i dici: „Mi ta Josef, mi tata ta na biba ainda?” Su roemannan a spanta mashá, ma Josef a papia carinjosamente coe nan i dici: „Jega acerca; pa boso salvacion Dios a manda mi, promer koe boso, na Egipto, pasobra tin cincoe anja mas di hamber.”

Caba Josef a braza Benjamin i toer su roemanningan, koe toer tabata jora di legria.

Josef a paga su roemanningan maloe coe bon. El a haci anto caba loke Hesus a sinja hende despues: Haci bon na esnan koe tin odio contra boso.

XVII.

1. Jacob na Egipto 2. Su morto

1. Josef a larga su roemanningan bai i a doena nan regalo mashá precioso. El a manda nan trece nan tata bieuw i toer su posesionnan na Egipto.

Ora su roemanningan a jega cerca nan tata, nan a sclama: „Josef bo jioe ta na bida; i e mes ta reina riba toer tera di Egipto.” Promer ora Jacob no por a kere, ma ora su jioenan a conté toer cos i koe el a mira regalonan ricoe, el a grita:

„Basta pa mi; mi jioe Josef ta na bida ainda; lo mi bai i lo mi miré promer mi moeri”.

Jacob i toer su familia a bai Egipto. Josef a bai contra su tata. Asina el a mira su tata, el a boela sali for di wagen. El a cohe su tata braza i a jora di legria.

Jacob dici: „Awor lo mi moeri toer sosegá, pa-sobra mi a mira bo cara atrobe”.

Pharao a participa den legria di Josef i a doena na su tata i su roemanningan e pueblecito Gessen, koe ta parti di mas fertil na Egipto, pa nan biba ai sosegá i cria nan familia. Es tempoe-ai Jacob tabatin 130 anja i el a biba 17 anja mas na Egipto.

2. Ora Jacob a cai maloe, el a jama Josef i toer

su otro roemannan cerca djé i a bendiciona nan toer. El a toema tambe e dos jioe di Josef como su jioenan i di tal manera Josef a hanja dobbel partida den herencia. Na su jioe Huda el a profetizá:

„Septer lo no ta kitá for di Huda, tantem koe bini El koe lo ta mandá. E lo ta e Deseado di pueblonan”.

Despues koe Jacob a papia coe toer su jioenan, el a pone su cabez den braza di Josef i el a moeri. Josef a balsamé i a deré coe solemnidad na Canaän.

Despues di morto di Jacob, roemannan di Josef tabatin miedoe koe Josef lo toema benganza di loke nan a haci coen'é; nan a manda respondi p'é, pa pidié loebida nan falta i pa perdona nan.

No solamente Josef a perdona nan, manera nan a pidi, ma el a consola nan tambe coe palabra dushi i te na su morto el a trata nan coe benevolencia paternal.

Josef a biba 54 anja mas despues di morto di su tata. Ora el a sinti su ora jega, el a profetiza su roemannan, koe un dia Dios lo hiba Hudioenan trobe na tera di Canaän, i el a manda nan di cohe su wesoenan i dera nan ai. Josef a moeri na edad di 110 anja.

Josef tabata un figura di nos Redentor, tantoe den su gloria como den su sufrimentoe. Su roemannan a codicié pa su bida virtuosa i a bendé pa 20 placa di plata.

Un pagano Putifar a condené inocente i a larga ceré na prison. Despues el a sali for di prison i nan a colmé coe honor i dignidad.

XVIII.

E Homber Santoe Job. Un ehemplo di paciencia i soemision na Santa Boluntad di Dios.

Den tempoe di patriarcanan a biba na tera Huž un homber ricoe, hustoe i leal, jamá Job. E tabatin 7 jioe homber i 3 muher, i tabatin 7000 carné, 3000 kameel, 500 baca, 500 buricoe i ma-shá criar.

Dios a permiti diabel pa tenta es homber santoe coe toer clase di tribulacion, p'é sirbi di un gran modelo di birtud i paciencia pa toer siglo.

Un cierto dia, koe toer e jioenan di Job a bai come cerca nan roeman mayor, ladronnan a bini koe a cohe toer su baca- i buricoenan i a mata su criarnan; rayo a cai for di cieloe i a mata toer su carné- i wardadornan; ladronnan a horta su kameelnan; un bientoe fuerte a tumba cas, camina toer su jioenan tabata huntoe i nan toer a moeri.

Ora Job a tende es desgracianan, el a lamanta para i di tristeza el a kibra su bistir, ma el no a murmura, ni keha. El a cai coe su cara na sue-la i dici: „*Senjor a doena, Senjor a toema, bendicioná sea nomber di Senjor.*”

Ora satanas a mira koe Job a keda fiel na Dios, no obstante toer e martirio, e kier a heridé personalmente. El a doené un enfermedad terribel. Toer su curpa, di cabez té na pia, tabata cubrí coe herida. Toer hende a hui for di djé; hasta su muher mes, na lugar di consolé, a boton di djé, haciendo su bida mas amargo; ma Job a bisé: „Si nos a ricibi cos bon for di manoe di Dios, pakiko lo nos no ricibi maloe tambe?”

Job a hajé obligá di bai biba riba un monton di cos sushi.

A bini tambe tres amigo di Job pa consolé den sufrimentoe; ma ora nan a mira su miseria, nan no a papia ni un palabra. Porfin ora Job a coeminza papia di su sufrimentoe, nan a tira na su cara, koe esai ta un castigoe di su picarnan di antes, ma Job a moenstra nan koe muchoe bez



bon hende mester sufri hopi den es bida aki, mientras mal hende ta goza hopi bez di prosperidad.

Dios mes a castiga e tres amigoenan, ma Job a pidi Dios pa nan i Dios a pordona nan nan falta.

Porfin Dios tabatin piedad di su sirbidor; El a doena Job su salud, el a redobla e rikezanan perdí i a doené un familia numerosa.

Es patriarca santoe aki a jega na 110 anja. El a mira su nietoenan te na cuarto generacion i el a moeri contentoe.

Ora Dios ta bishita nos coe cruz i sufrimentoe, larga nos bisa mescos koe e homber santoe Job: „Senjor a doena, Senjor a toema, bendicioná sea number di Senjor.

Si nos a ricibi cos bon for di manoe di Dios, pakiko lo nos no ricibi maloe?”

XIX.

1. Esclabitud na Egipto 2. Nacementoe i crianza di Moises. 3. Su huimentoe.

1. Descendientenan di Josef i su roemannan tabata jama *Hebreo- óf Israëlitanan* i tabata partí den diez dos tribu, jamá segun nombenan di e diez dos jioe di Jacob. Nan a bira mashá numeroso na Egipto i habitantenan di Egipto a codicia nan fortuna. Un rey nobo koe no a conoce Josef a hanja mando riba Israelitanan.

El a coeminsa primi Hudioen an duroe i a forza nan di kima klinkernan i di haci trabao pisá koe catiboenan tabatin coestumber di haci.

Ora e medio no a juda, rey a doena orde pa tira toer jioe homber di Israelitanan na awa, asina koe nan a caba di nace, pa hoga nan.

2. Un muher for di staca di Levi, a doena luz na un mucha homber mashá gracioso, koe el a tene scondi duranti tres luna, ma awor e tabatin miedoe pa tené mas largoe cerca djé. P'esai el a traha un macutoe di cabana, a hunté bon coe breuw, i a pone su jioe den djé, poniendo é denter di jerbanan, koe tabata crece na cantoe di rioe. Maria, roeman muher di e jioe, a sconde su curpa, p'e mira, kiko lo socede coe su roeman. Mes ora jioe muher di rey a jega ai. Mirando e macutoe el a larga un criar muher cohé; i

ora nan a abrié, nan a haja un mucha chikitoe jorando aden.

„Esaki ta sigur un jioe di Hebreonan,” el dici.

Awor Maria a sali for di lugar oenda el a sconde su curpa i el a puntra jioe di rey, si e kier p'é busca un mama hebrea pa cria e jioe. „Bai busca”, e princesa dici, i Maria a corre bai cas liher pa busca su mama. Esaki a ricibi e jioe i a crié, i ora el a bira mas grandi el a hibé trobe cerca jioe di Pharaon, koe a toema e jioe como su jioe i a jamé Moises.



Nan a cria Moises na cas di rey i a sinjé toer ciencia di Egipcianan. Ma ora el a bira homber el a mira coe tristeza grandi com nan tabata primi su pueblo. Hopi bez el a bai for di palacio di rey pa bishita i consola su roemannan.

3. Un cierto dia el a mira com un Egipcio a maltrata un Israelita. Moises kier a judé i el a dal e Egipcio mata.

Pharao tendiendo esai a manda pa nan mata Moises. Ma Moises a hui bai Arabia, camina Madianitanan tabata biba. Aja el a biba den cas di Jetro, coe kende su jioe el a casa. Durante 40 anja Moises a warda carné di su suegro Jetro.

Manera Moises a scapa pa un proteccion particular di Dios for di manoe di Pharao, asina dibino Niño Hesus a scapa for di manoe di Herodes.

Asina muchoe bez Dios ta stroba hende maloe den nan obra perverso; p'esai larga nos pone nos confianza semper riba Dios.

XX.

1. Vocacion di Moises. 2. E diez plaganan.
3. Lamtji di Pascu. 4. Salimentoe for di Egipto



1. Un dia koe Moises tabata warda carnénan di su suegro, el a jega na pia di seroe Horeb. Aji

Senjor a parçe n'é den un mondi toer na candela, sin ta kima. Moises a jega mas acerca p'e reconoce e milagro koe e ta mira socede. Ma di ri-piente un boz a sali for di e mondi, koe tabata bisé:

„Moises, Moises.” El a responde: „Ata mi”. I e boz a bisé: „No jega mas acerca, kita bo zapatoe for di bo pia, pasobra lugar koe bo ta para ariba ta tera santa. Mi ta Dios di bo tata, Dios di Abraham, Dios di Isaác i Dios di Jacob.”

Moises koe no tabata risca mira Dios a tapa su cara coe su mân, i Senjor a sigui papia: „Mi a mira afliccion di mi pueblo na Egipto, i Mi ta bini pa manda bo na Pharao pa saca mi pueblo, jioenan di Israel, for di Egipto.”

Moises a escusa su mes, pasobra e tabatin miedoe pa e bon resultado i dici: „Ta ken mi ta, pa bai cerca Pharao, i pá saca jioenan di Israël for di Egipto?” Anto Dios a bisé: „Lo Mi ta coe bo.” Dios a doené es ora poder pa haci milagro.

Es ora ai Moises a bai Egipto i pa poder di Dios el a bai coe su roeman Aäron huntoe coe n'e. Nan toer dos a bai cerca rey i a pidié pa Israelitanan bai, pasobra Jehova, Dios di Israël, ta desea esai.

Un biaha mas nan a bolbe bai cerca Pharao. Aäron a tira su baston abao na suela i mes momento e baston a troca na un colebra; ma rey no kier a larga pueblo bai.

2. Awor Dios su castigoe terribel a cai riba es tera di Egipto, koe nan ta jama *plaga*. Promer, awa di rioe Nilo a troca na sanger; piscarnan a moeri i ningun hende no por a bebé mas; despues Aäron a alza su mânnan riba awa i un porcion incontabel di sapoe a cubri henter tera; nan tabata drenta hasta den cas i forno. Despues



aire a jena coe sangura, koe tabata tormenta hende i bestia. Ora e plaga a caba, i koe Pharao a persisti di no larga pueblo di Dios sali for di Egipto, Dios a jena aire coe toer sorto di mal bestia, koe tabata boela, i koe a tormenta toer hende. Caba a bini un peste terribel den animal; despues hende i bestia tabata tormentá pa mal jaga. Boz i grano di ijs spantoso a destrui toer cos na coenucoe, i dalacotji a devora toer loke a keda para ainda. Por último un tiniebla di mas grandi a tapa tera di Egipto tres dia largoe, asina koe ningun hende no por a mira otro.

Es ora ai Pharao a bisa Moises: „Bai boso toer, i haci boso Sacrificio, ma toer boso bestianan mester keda aki.” Moises a respondé, koe el mester larga toer bestia koe nan tin bai, i koe nada di nan no por keda na Egipto.

Anto rabiando Pharao dici: „Bai for di mi i cuidao koe mi no mira bo cara mas,” pasobra dia koe lo bo parce mi dilanti trobe, mi ta larga mata bo.”

Es ora ai Moises a pronostica Pharao e ultimo desgracia di mas spantosa koe a cohe Egipcianan.



3. Na number di Dios Moises a doena Israëlitanan orde pa mata un lamtji. Coe sanger di e lamtji nan mester a moeha kozijn di porta i drem-pi di ariba di nan cas. Pasobra su siguiente anochi Senjor lo pasa den Egipto i mata toer jioe promer nacé; ma lo El no drenta e casnan, hun-tá coe sanger di lamtji di sacrificio.

Nan no por a kibra wesoe di es lamtji, mester a asé na candela i comé coe pam sin zuurdeeg; na ora di cena nan mester para clá pa biaha, coe baston den nan manoe, — pasobra Moises dici: ta Pascu (esta: *pasashi* di Senjor).

Mientra Israëlitanan a celebra nan promer fiesta di Pascu den silencio profundo, tabatin un jo-ramentoe spantoso den Egipto. Miles hende a moeri den un momento es anochi ai; den cada cas, tantoe den palacio di rey como den cas di mas pober, tabatin un morto.

Toer promer nacé di Egipcianan a moeri i no di hende sol, ma di bestianan també.

4. Anochi Pharao a manda un mensahero cerca Moises i Aäron pa doena nan orde pa nan sali inmediatamente coe toer nan hende i nan jioenan i toer nan bestia. Egipcianan a pidi nan pa haci purá, sclamando: „Bai liher, sino nos toer ta moeri.”

Israëlitanan a sali anto for di Egpito na número di 600.000 homber, na toer mas ó menos dos miijón di alma. Dios mes tabata nan guía, di dia pa un nubia scur, i anochi pa un columna di candela, koe tabata doena luz.

Lamtji di Pascu di Hudioenan tabata un profecía i un imagen di Cristoe, Lamtji di Dios, koe ta kita picar di mundoe.

Ora Cristoe a sacrifica su mes na cruz, nan no a kibra su wesoenan; su sanger santoe a libra nos di morto eterno.

Lamtji sacrifcá di Dios ta doena su mes como coeminda i bebida di nos alma den Santa Comunion.

XXI.

1. Pasamentoe den Lamar Corá.
2. Milagronan den desierto.

1. No a pasa muchoe tem koe Israelitanan a sali for di Egipto, koe a duel Pharao koe nan a bai.

El a sali coe un ehército grandi pa persigui nan i banda di Lamar Corá el a topa coe nan.

Weitando Egipcianan, koe tabata persigui nan, Israelitanan jen di temor a coeminza grita i murmura contra Moises; ma Moises a bisa nan di no

teme, ma di warda e milagronan grandi koe Sen-jor lo haci.

Ora anochi a cera, e columna di nubia a bin para meimei di Israelitanan i Egipcionan. Na un banda e tabata plama un luz clá, ma na otro banda e tabata scur-scur.

Es ora pa orde di Dios, Moises a extende su mânnan riba lamar, awa a parti na dos te na fondo i a fica para manera muraja na toer dos banda, i anochi a soepla un biento bon duroe i ardiente, koe a seca fondo di lamar.



Ora di dia a abri, Egipcionan no a mira nan mas. Porfin nan a ripara e camina, oenda Israelitanan a pasa. Rey a sigui nan tras te meimei di lamar. Di golpi a lamanta un tempestad pisá, Egipcionan a spanta i nan kier a hui bai; ma tabata muchoe laat. Moises a saca su mânnan, lamar

a bolbe bini na su lugar i henter ehército di Pharao a hoga.

Israelitanan, mirando nan salbá, a reconoce i alaba omnipotencia di Dios i Moises a canta coe pueblo un cantica na accion di gracias na Senjor.

2. Siguiendo nan biaha, Hudioenan a jega na *Mara* i nan a coemiza murmura contra Moises, pasobra nan no a hanja nada sino awa amarga.

Pa orde di Dios Moises a tira un paloe den awa i awa a bira dushi. Ora nan a jega den desierto *Sir*, nan a bolbe murmura, pasobra nan no tabatin carni ni pam. I mira, banda di atardi un cantidad grandi di páhara a boela den desierto, asina abao, koe nan por a cohe nan coe nan mân. Su manece asina leuw koe nan por a mira suela tabata tapá coe pipita chikitoe rondó i blan-

coe. Hudioenan a fica admirá i un tabata puntra otro: „Ta kiko esakinan?” „Esaki ta pam koe Senjor a doena boso pa boso come.”

Nan por a reuni cuantoe koe nan tabatin mester; ma dia Biernes nan mester a toema dobbel, pasobra dia di Sabbath



manna no tabata jobe. Coe es pam celestial Dios a alimenta Israëlitanan, tempoe koe nan tabata den desierto.

Algun tempoe despues Hudioenan a bolbe mur-

mura koe no tin awa pa bebe. Moises a dal su bastón riba baranca i awa a corre afor na abundancia.

Aki jioenan di Israël tabata atacá pa Amalecitanan. Moises a manda Josué coe un ehército riba nan. E mes a alza su braza i a reza huntoe coe Aäron riba ceroe. Ora Moises tabata lariga su mânnan baha, su enemigoenan a vence; ma asina el alza nan, victoria tabata na banda di Israëlitanan. P'esai dos homber a sostene braza di Moises, te ora Josué a bati enemigoe completamente.

Si Moises lo no a reza, su enemigoenan sigur lo a bati Josué; ma enemigoenan no por a resisti na oracion di Moises i pa su oracion un homber sol tabata mas fuerte koe toer.

Manna ta un imagen di Santisimo Sacramentoe di altar.

XXII.

1. Doenamentoe di ley riba ceroe di Sinai.

2. Bicé di Oro. 3. Tabernáculo.

1. Cuarenta i siete dia despues koe Israëlitanan a sali for di Eipto, nan a jega ceroe di Sinai. Aki Dios a manda pa henter pueblo preparé i santifiké dos dia pa ricibi su santa Ley.

Di tercer dia un nubia pretoe a baha ariba e ceroe. For di es nubia boz a grita terribel i toer banda lámpara a corta aire; sonido di trompet a sona spantoso den orea di Hebreonan. I toer a jega temblando na pia di ceroe, koe tabata toer na candela; den es lamar di candela Dios a baha coe miles Angel.

I Dios a doena su diez mandamientoe. Riba es ceroe Dios a marca e diez mandamientoe koe El a doena su pueblo den dos piedra koe El a doena Moises, manera Iglesia di Cristoe ta sinja ainda na toer cristian i koe Hudioenan tin també den nan ley te dia di awé.



2. Moises a scirbi ley dibino den un boeki, el a traha un altar na pia di ceroe i el a ofrece un sacrificio na Dios. El a jama es boeki ai *Boeki di Alianza* i el a lezé pa pueblo tende. I henter pueblo a responde: „Toer es koe Dios a manda, nos kier haci.” Es ora Moises a subi ceroe i a keda ai cuarenta dia i cuarenta anochi. Despues Dios a doené dos tabla di piedra, coe diez mandamientoe scirbí ariba.

Pueblo di Israël koe a ricibi asina tantoe bene-

ficio di Dios, a doena un ehempel lamentabel di inconstancia i di infielidad.

Moises tardando tantoe riba ceroe, pueblo a ke-re koe nan lo no miré mas. Nan a bai cerca Aäron i dici coe né: „Traha pa nos diosnan, koe por bai nos dilanti, pasobra nos no sabi kiko a socede coe Moises.” Pa miedoe Aäron a consenti.

Es ora ai Dios a bisa Moises: „Bai, baha (for di ceroe,) bo pueblo koe Mi a saca for di Egipto a peca. Nan a traha un bicé di oro i nan a adoré. Larga Mi, pa Mi rabia cai riba nan. Lo Mi destrui nan i lo Mi haci bo cabez di un pueblo mas grandi.’ Ma Moises a reza pa su pueblo i dici: „Senjor, pakiko Bo ira mester lamanta contra bo pueblo? ai, larga placa Bo ira i pordona malicia di Bo pueblo.”

I Dios a scucha oracion di Moises, ma El a manda di mata toer koe a sigui haci idolatria.



Número di nan, koe nan a mata, tabatá mas ó menos 23 mil.

3. Dios a larga traha awor un *tent santoe* ó *tabernáculo*. E tent santoe tabata un caha largoe cuadrá di paloe precioso, 30 pia largoe, 10 altoe.

E tabata consisti di dos partida: e partida di mas grandi jama *Santoe*, i e otro jama *Santoe di Santoenan*.



Arca di alianza tabata wardá den Santoe di Santoenan.

Arca di alianza tabata un caha cuadrá, furá p'afor i p'aden coe oro. Den es arca tabatin e dos tablanan di ley i vaso coe manna, dos cherubin di oro tabata na roedia ri-

ba tapadera. Den Santoe tabata para e kandelaar di oro coe siete braza, mesa di *pamnan di proposicion* i *altar di perfume*, toer dos montá coe oro. Den *vestíbulo*, un espacio cerá rondó di tabernáculo, tabatin altar di sacrificio di kima i e vaso grandi di koper pa laba.

Ora tabernáculo coe toer cos, koe tabata per-



tenece n'é tabata drechá, un nubia milagrosa a baha riba tent santoe, i mahestad di Dios a jené; i for di es momento e nubia a keda riba tabernáculo.

Pa orde di Dios Moïses a hunta su roeman Aäron pa gran sacerdote i su jioenan pa sacerdote; el a consagra henter tribu di Levi tambe na sirbishi di Dios.

Santuario di Hudioenan tabata un imagen di nos misanan. Santoe di Santoenan ta nos tabernáculo, oenda Hesus mes ta presente den Santísimo Sacramento di Altar. Santoe di Hudioe ta nos presbiterio ó e lugar denter trapí di altar i mesa di Santa Comunión. Vestíbulo ta lugar tras di mesa di Comunión, oenda Cristiannan ta reuní pa reza.

XXIII.

1. E spionnan. 2 Bara di Aaron. 3. Awa for di baranca. 4. Colebra di koper. 5 Diferente castigoe.

Dos anja despues koe jioenan di Israël a sali for di Egipto, nan a jega na limite di Tera primintí, Canaän. Pa orde di Dios Moises a manda

12 homber bai investiga es tera.



Despues di 40 dia nan a bolbe i nan a bin moenstra pueblo frutanan di es tera: esta un troshi grandi di druifi, koe dos homber tabata carga na un bara, algun figo i granaatappel.

Nan dici: „En berdad es tera ta jen di lechi i stroopi, ma habitantenan ta grandi i balente i nan tin ciudadnan grandi i rondoná coe muraja.” Di es manera nan a hinca miedoe den curpa di pueblo i hacié rebelde.

Ma Josué i Caleb koe a biaha den henter es tera a bisa: No lamanta contra Senjor, i no tene miedoe pa pueblo di es tera, pasobra manera pam nos por destrui nan; Senjor ta coe nos, no tene miedoe.” Ma pueblo kier a piedra nan i bolbe bai Egipto. Es ora ai Dios a bisa: „Cuan-toe tempoe es pueblo aki lo insulta Mi? Lo Mi manda peste riba djé i destruíé.” Ma Moises a bolbe pidi Dios i dici: „Mi ta pidi Bo, perdona picar di es pueblo, pa Bo grandi misericordia.”

Dios a bolbe scucha oracion di Moises, ma pa nan castigoe Hudioenan mester a rondia 40 anja den desierto; i ningun hende koe tabatin mas koe 20 anja no por a drenta den Tera priminti Canaän, fuera Josué i Caleb. E diez spionnan, koe a haci pueblo lamanta, a keda morto di ripiente camina nan tabata.

2. No muchoe tem despues tres Levita, esta tres homber di staca di Levi, coe 250 rebelde a lamanta contra Moises i Aäron. Nan tambe a pretende di ta sacerdote. Ma tera a abri bao di nan i a guli e tres levitanan i un candela a bini for di cieloe i a mata e otro 250 rebelde nan.



Despues Moises a toema 12 bara koe tabatin nomber di cada un djé diez dos stacanan scirbí ariba. Aäron tambe a doena su baston. Moises a pone e 13 bastonnan dilanti Arca di Alianza. I ata, su manece baston di Aäron a florece i a doena fruta; e otro bastonnan a keda morto. Asina Dios a moenstra na henter pueblo, koe E mes a scohe Aäron pa gran sacerdote.

3. Algun tem despues pueblo a bolbe murmurá, pasobra e no tabatin awa.

I Senjor a bisa Moises: „Toema bo bara i reuni pueblo, bo i bo roeman Aäron i papia coe nan riba baranca i lo e doena awa.”

Moises a cohe su bara, el a dal dos bez riba baranca i awa a boela afor. Ma el a duda un

momento, si Dios lo haci trobe un milagro pa es pueblo ingrato. Pa castigoe Moises no por a drenta Canaän. Hudioenan a keha tambe di es biaha largoe i dificil i a papia coe desprecio di e manna koe Dios tabata manda pa nan toer dia for di cieloe. P'esai Dios a manda colebra venenosa meimei di nan. Colebra a morde hopi di nan i nan a moeri. Moises a pidi Dios trobe pa su pueblo, i Dios a scucha trobe su oracion i El a mandé di traha un colebra di koper i di cologé na un paloe, pa toer hende koe colebra morde, mester bin mira e colebra di koper, i nan tabata curá mes ora.



4. Un Israëlita a saca un blasfemia i pa orde di Dios nan a piedré; un otro a piki paloe dia di Sabbath, e tambe tabata piedrá; i Maria, roeman di Moises, a haja laster, pasobra el a murmura contra Moises.

E diez dos spionnan a moeri un morto ripiente. Tera a guli e tres Levitanan, candela a mata e 250 rebelde i colebra venenosa a morde i a mata Hudioen an murmurador. Asina nos ta mira, koe picar ta haci hende desgraciado. „P'esai hui picar, manera ora bo ta mira un colebra.”

 XXIV.

1. Morto di Moises. 2. Biaha den Jordaan.
 3. Toemamentoe di Jericho 4. Habitantenan di Gabaon. 5 Lucha grandi

1. Toer Israëlita koe Moises a libra for di sclatitud di Pharao a moeri caba, fuera Josué i Caleb; nan a crece na un generacion nobo i Senjor su ora a jega pa hiba nan den tera di Canaan.

Ora Moises tabata cerca di moeri, el a spierta Hudioen an un bez mas pa nan cumpli bon coe mandamientoenan di Dios, i el a nombra Josué pa su sucesor.

Despues el a doena sacerdotenan ley di Dios scirbí den un boeki, pa nan poné banda di Arca di Alianza, i cada siete anja, riba fiesta di Tabernáculo, nan mester a lezé pa pueblo tende.

Despues Moises a subi ceroe di *Nebo*, oenda Dios a largé mira tera priminti; riba es ceroe el a moeri na edad di 120 anja; henter pueblo a joré 30 dia largoe.

2. Despues koe es 30 dia di luto a pasa, jioenan di Israel a sali bao di mando di Josué pa ocupa tera priminti. Ora nan a jega na cantoe di rioe Jordaan, sacerdotenan a pasa p'adilanti coe Arca di Alianza. Conforme nan pia a toca awa, awa koe tabata bini di ariba, a keda para i e otro a

coeri bai, asina koe Hudioenan a pasa rioe Jordan sin moeha nan pia. Hudioenan a come di fruta di tera i manna a stop di jobe for di cieloe.

3. Israelitanan a jega awor dilanti di ciudad di Jerico, koe tabata rondoná coe muraja altoe i fuerte. Pa orde di Dios durante seis dia nan mester a pasa rondó di ciudad un bez pa dia; ma di siete dia nan mester a pasa siete bez rondó di ciudad. Di siete bez koe nan tabata pasa nan a toca trompet i Josué a sclama: „Dal un gritoe, pasobra Dios ta entrega boso e ciudad den boso mân.”



Hènter pueblo a dal un gritoe i murajanan a cai i Hudioenan a drenta Jerico. Nan a destruí i cendé na candela. Despues nan a podera di e otro ciudad Hai i nan a kimé.

4. Ora habitantenan di Gabaon a mira loke Hudioenan a haci coe e cuidadnan Jerico i Hai, nan

a pone un trampa. Nan a manda un embahador cerca Josué pa biséle: „Nos ta bini di un tera leuw for di aki, i nos kier cera paz coe bo”. Josué a larga nan ganjé i sin consulta Dios el a cera un alianza coe nan, loke cabeznan di pueblo tambe a hura.

5. Reynan di Canaän a rabia mashá riba Gabaon, i cincoe rey a sali coe nan ehército pa castiga es ciudad. Josué a juda nan i a bati e cincoe reynan.

Nan a hui, i ora nan tabata sconde nan curpa den ceroenan, piedra grandi a jobe for di cieloe, koe a dal e soldánan mata. Pa oracion di Josué solo a keda para te ora Hudioenan a caba coe nan victoria.

Na toer Josué a vence 31 rey i el a parti nan reino den 12 partida. Staca di Levi no a hanja un partida, pasobra e tabata dedicá na sirbishi di Senjor, ma den diferente tribu ó staca nan tabatin 48 ciudad pa nan biba aden. Josué a goberna su pueblo 10 anja na paz i el a moeri na edad di 110 anja.

Moises ta un di e figuranan di mas grandi di Cristoe. For di su mucha chikitoe nan a buské di mata. El a libra su pueblo for di sclabitud di Egipto. E tabata un gran profeta i un mediator den Dios i pueblo hudaico.

XV.

1. Hueznan. 2. Gedeon. 3. Samson.

1. Despues di morto di Josué jioenan di Israel a bandona pronto camina di Dios i a cai den idolatria; p'esai Dios a entrega nan den mân di nan enemigoe. Ma ora nan a comberti atrobe na Dios, Dios a manda pa nan hombernan balente, jamá huez, kende a libra nan for di manoe di nan enemigoe.

2. Un di es hendenan aki tabata Gedeon. El a reuni un ehército di 32 mil homber, pa bai ataca enemigoe. Ma Dios a bisé: „Bo tin mucho hende”. I Gedeon a baha número di su hende pa orde di Dios te na 300 i Dios a bisé:

„Coe es 300 homber lo Mi libra boso i lo Mi entrega bo Madian”. Awor Gedeon a parti su 300 homber den tres partida i a doena cada soldá un trompet i un tinashi coe un flambeo cendé. Anochi nan a pasa rondó di ehército di Madiantanan, nan a toca trompet, a dal e tinashinan kibra, a zwaai e flambeo cendé i grita: „Spada di Senjor i di Gedeon.”

Unbez ehército di enemigoe a spierta spantá i a haja nan den confusion; nan a dal grito i un no a mira otro mas. 120.000 di nan a moeri morto di spada.

3. Samson tabata un homber di forza milagroso koe Dios a destina pa defende pueblo di Israel contra opresion di Filistéonan. Den su hubentud el a mata un león, koe a boela riba djé.

Tem Samson tabata huez, Filistéonan a oprimi Israëlitanan mashá. Pa castiga nan el a cohe 300 zorro un dia, el a mara nan dos-dos, el a

pone un flambeo cendé meimei di nan i a manda nan den coenucoe di trigo di Filistéonan. Mes ora toer paloe di trigo a pega na candela. I ora nan kier a cohé preso, el a dal mil Filistéo coe un cachete di buricoe mata.

Un dia koe el a drenta den un ciudad di Filistéonan, jamá Gaza, Filistéonan a cera porta di ciudad pa cohé; ma anochi Samson kier a sali; el a los e porta, el a poné riba su schouder i el a bai tiré riba un ceroe aibanda.

Mientras Samson a cumpli coe ley di Dios el a keda invencibel, ma asina el a kita for di camina di birtud el a cai den manoe di su enemigoenan.

Samson a revela un mala muher, koe si nan corta su cabei, lo e perde toer su forza i e muher, seducí pa placa di Filistéonan, a corta su cabei mientras el tabata na sonjo i a entregé na mân di su enemigoenan.

Filistéonan a saca su wowo, nan a maré coe cadena i nan a ceré den prison i nan a obligé di draai un moelina. Ma coe tempoe su cabeinan a crece, el a comberti, i Dios a doené su forza atrobe, i awor e kier a paga su enemigoenan e maloe koe nan a hacié.

Un dia koe Filistéonan a celebra un fiesta grandi na un di nan diosnan falsoe, nan kier a diberti nan coe Samson i nan a hibé tempel. Samson a bisa e mucha koe tabata tene su mân, hibé meimei djé dos pilarnan koe tabata sostene e tempel, p'é leun contra nan.

Ora el a jega na e dos pilarnan, el a cohe nan meimei di su brazanan i invocando na Senjor el a sclama: „Koe Samson moeri i koe Filistéonan tambe moeri huntoe coe n'é.” I sagudiendo fuertemente e columnanan, nan a cai; tempel a

basha abao i Samson moeriendo a mata mas tantoe Filistéonan koe el a mata den henter su bida.

„Hende koe ta confia riba Dios ta para riba un tera firme.” Madianitanan a confia riba nan número grandi i riba nan arma; ma Gedeon a confia riba Dios i Dios a judé

Pa Dios ta mes facil pa doena auxilio coe poco ó coe hopi hende. P'esai larga nos pone semper nos confianza riba Dios.

XXVI.

1. Heli i su jioenan. 2. Samuel.

Heli tabata huez i gran-sacerdote di Israëli i tabatin dos jioe, Ofni i Fineës, ocupá den ministerio di tabernaculo.

No contentoe coe e partida di sacrificio koe nan tabatin derecho ariba, nan tabata cohe pa nan mes di mehor partida di sacrificionan koe pueblo tabata ofrece na Dios; p'esai hendenan a stop di haci sacrificio na Senjor.

Heli tabata anciano i conociendo mal conducta di su jioenan e no a corrigi nan, manera mester. P'esai e jioenan a sigui doena muchoe escándalo. Senjor indigná contra Heli a anuncié pa boca di un profeta e castigoenan grandi koe l'E manda riba djé i su jioenan.

2. Na tem koe Heli tabata gran-sacerdote Samuël a nace. Su majornan a priminti pa consagré pa henter su bida na Senjor, i ora el tabatin tres anja, nan a hibé pa Sumo-Sacerdote pa sirbi Dios den cas di Senjor. Samuël chikitoe a crece i tabata gustoso cerca Dios i hende.

E tabata biba huntoe coe Heli, i tabata droemi

no leuw for di camina Heli tabata droemi. Un anochi, mientra el tabata na sonjo, el a tende manera un boz tabata jamé. El a kere koe tabata boz di Heli i el a lamanta mes ora bai cerca gran-sacerdote i dici; „Bo a jama mi?” Heli a responde: „Mi no a jama bo; bai, mi jioe, bai droemi.”

Un rato despues Samuël a tende e mes boz; el a lamanta i a bai cerca Heli; ma el a haja e mes respondi. Te tres bez Samuël a tende e mes boz i pa di tres bez el a bai cerca Heli. Es ora ai Heli a comprende, koe Dios tabata jama e hoben i dici: „Si bo tende nan jama bo un biaha mas, bisa: „Papia Senjor, bo sirbidor ta tende Bo ” I Dios a bolbe jamé: „Samuël, Samuël!” I Samuël a responde: „Senjor, papia bo sirbidor ta tende Bo.” Es ora ai Dios a bisé: „Ata, es koe lo Mi haci den Israël lo sona den dos orea di nan koe kier tende. Riba es dia lo Mi basha toer calamidad riba Heli, koe Mi a menaza su cas coe n'é; lo Mi coeminza i lo Mi caba, pasobra el a sabi ki maloe su jioenan ta comporta nan i e no a castiga nan.”

Den es tempoe Israëlitia- i Filistéonan a haja gera coe otro i na promer encuentro ehército di Israël, 4000 homber, a haja un derrota grandi. Nan a risca un otro batalja i a hiba Arca di Alianza na campamentoe; ma Israël, no teniendo proteccion di Dios mas, a haja un derrota mas terribel koe e promer, ya koe nan a mata 70.000 homber. Enemigoe a cohe Arca di Alianza i toer dos jioenan di Heli a moeri.

Heli tendiendo e mal noticia di derrota di su pueblo, di morto di su jioenan i di perdida di Arca di Alianza a cai p'atras for di un banki i a kibra su garganta i a moeri.

Despues di morto di Heli, pueblo, conociendo koe Senjor tabata coe Samuël i koe e tabata un gran profeta, nan a eligié pa huez.

Despues di su eleccion pa huez, Samuël a papia coe pueblo di Israël: „Si boso lo bolbe di henter boso coerazon na Senjor, kita anto e diosnan stranjero for di meimei di boso, i prepara boso coerazon pa Senjor i sirbi El sol i lo E libra boso for di manoe di Filistéonan.” Toer a obedece na palabra di Samuël. Nan toer a juna, a confesa nan falta i a jora nan picar. Dios a scucha nan oracion i a juda nan den gera contra Filistéonan.

Israëlitanan a obtene un victoria briljante riba nan enemigoe; nan a recobra Arca di Alianza i ciudadnan perdí bao di gobierno di Heli, i nan a goza paz i tranquilidad perfecta durante 40 anja.

Ma como Samuël a bira bieuw i e jioenan koe el a scohe pa ta su sucesornan a kita for di camina di birtud, pueblo a pidié un rey. Samuël a haci toer cos pa kita es idea for di nan cabez, ma nan no kier a tende i a persisti p'ê doena nan un rey como sucesor. Profeta a consulta coe Dios, koe a doena pueblo es koe el a desea, i a scohe Saül, jioe di Cis, for di staca di Benjamin, pa ta consagrá pa rey.

Jioenan di gran-sacerdote a moeri riba un dia. Asina Dios ta castiga muchanan perverso, i mayornan koe no ta castiga nan jioe ora nan ta merece. No larga nos sigui nan; ma larga nos sigui e Samuël deboto, pa Dios i hende bendiciona i stima nos.

XXVII.

1. Saul, promer Rey. 2. David i e gigante Goliath.

Saül tabata homber di mas balente di Israël, grandi di curpa i boenita; na principio di su gobierno humilde i birtuoso.

Poco tem despues di su nombramento Amonitanan a drenta den tera di Hudioenan.

Net Saül tabata bai cas coe dos bué, ora el a tende es nobo. Mes momentoe el a sintié rey. El a toema un spada, a kap e buénan na pida-pida, a manda e pidanan den henter tera i a larga nan grita na toer camina: „Es koe no sali pa sigui Saül i Samuël, lo mi kap nan bué di mes manera.”

Es ora ai toer a reuni i a marcha balente. Anochi Saül a bini den ehército di enemigoenan i a bati nan completamente, koe ni dos homber a fica para cerca otro.

Un dia Samuël a bisa Saül p'é bai na un ceroe i warda siete dia aja, pasobra di siete dia Samuël mes lo bini pa ofrece sacrificio na Dios; ma Saül, mirando koe di siete dia Samuël no a bini, e mes a coeminsa ofrece sacrificio.

Un otro dia pa orde di Dios, Saül mester a caba coe Amalecitanan. E mester a caba henteramente coe es pueblo, i no spaar ningun hende, ni nada di nan; ma el a spaar bida di rey i el a warda di mehor bestianan i hopi prenda precioso. Dios a larga Samuël corrigi Saül pa es faltanan, ma el a disculpé, diciendo, koe el a cohe toer cos di mehor pa ofrece nan na Dios como un sacrificio. Es ora Samuël a bisé; „Obediencia ta mehor koe sacrificio. Na un otro, mas mehor koe bo, Senjor lo doena reino di Israël.”

Dios a castiga Saül pa su faltanan. Un mal spiritu a podera di djé, di manera koe cada bez e tabata bira furioso. Hendenan di su corte a consehé p'é larga jama algun bon tocador di arpa, pa doena alivio na su mal genio.

Na Bethlehem tabatin un wardador di bestia, jamá David, un hoben balente, boenita cara i simpatico, koe tabata toca arpa excelente. Nan a larga jamé na corte di rey, i ora e mal spiritu tabata podera di Saül, David a toca arpa koe a placa fúria di rey.

2. Israëlitanan tabata na gera coe Filistéonan i e dos ehércitonan tabata para dilanti di otro. Den ehército di Filistéonan tabatin un gigante, jamá Goliath. E tabatin nuebe pia altoe, riba su cabez e tabatin un helm di koper i un harnas di koper tabata tapa su pechoe. Su lanza tabata mashá diki i coe un punta di heroe koe el por a bora un muraja coen'é. E homber ai saliendo for di ehército di Filisteonan a presenté na soldánan di Hudioenan i a provoca un di nan pa bin bringa coen'é: „Scohe un homber meimei di boso,” el a grita, „pa bringa coe mi. Si e bati mi, anto nos ta boso catiboe, ma si mi vencé, anto boso lo sirbi nos.” Esai el a haci 40 dia tras di otro. Saül i henter ehército tabata jen di spantoe i di ansia ora e gigante peligroso tabata sali for di ehército di Filistéonan, provocando Hudioenan pa bringa coen'é.

Di 40 dia David a bini den ehército pa tende com bai su tres roemannan. David a mira e gigante, ma e no tabatin miedoe di djé. „Ta kende e Filistéo ai?” David a puntra, „koe ta tribi di bofon di ehército di Dios biboe?” I el a bai cerca rey Saül i a bisé koe ningun hende mester

tin miedoe di es Filistéo, i si rey kier, lo el bringa coen'é i maté. Ma Saül. considerando su edad, dici: „Bo no por resisti e Filistéo ni bringa coen'é; pasobra bo ta un mucha, i e homber ta un bringador for di su mucha.” Ma David a responde, koe e no mester tene miedoe. I el a corda Saül koe un dia koe el tabata warda bestia di su tata un leon i un oso a cohe un carner i koe el a corre nan tras, a cohé i a mata nan sin otro arma koe su mân. I animá e dici: „El koe a libra mi un dia for di manoe di leon i oso, lo libra mi tambe for di man di es Filistéo ai.” Es ora ai Saül no por a resistié mas i dici: „Bai i Senjor sea coe bo.”

Saül a doena David su mes armanan, ma David no por a camna coe nan i el a bolbe kita nan. El a busca cincoe piedra lizo, el a cohe su baston i su slinger i a camna coe nan bai riba e gigante. Ora Goliath a mira e bini pa bringa coen'é el



a grita: „Acaso mi ta cachó anto, koe bo ta bini riba mi coe un paloe?” I David a bisé: „Bo ta bini riba mi coe spada i lanza i escudo; ma mi ta bini contra bo den nomber di Senjor di ehército.”

El a saca un piedra for di su sacoe i a zwaai e slinger coe asina tantoe forza, koe e piedra a keda pegá den cabez di Goliath i mes ora Goliath a cai na suela. David a cai riba djé i coe su mes spada David a kita su cabez for di su curpa. Philistéonan a hui, hombernan di Israël a persigui nan, i a bati partida di mas grandi di ehército di Filistéonan.

Tantem Saül tabata humilde i gustoso na Dios, e tabata feliz; ma ora el a alza su cabez i a bira soberbe, el a cai den picar i a bira desgraciado. Larga nos warda nos di soberbia i confia humildemente riba Dios como David.

XXVIII.

1. Odio di Saul. 2. Generosidad di David.
3. Morto di Saul.

1. Despues di un batalja nobo contra Filistéonan, koe Saül i David tabata regresa na nan cas, toer hende a ricibi nan coe música i cantica. Muhernan a bai contra nan i a canta: „Saül a mata mil, David a mata diez mil hende.” Saül a bira asina codicioso airiba, koe el no por a wanta David mas i el a busca di maté.

Ora David tabata toca arpa, di repente rey a cohe un lanza i a tiré pa mata David; ma Da-

vid a hala un banda. Poco tempoe despues Saül a haci David hefe di 1000 soldá, coe speranza koe lo e moeri den gera contra Filistéonan, ma David a vence nan.

2. Jonathas, jioe di Saül, a reconcilia David coe su tata trobe; ma no a dura largoe, koe Saül a bolbe tira David coe un lanza. David a hui i tabata rondea den mondi i ceroenan, pasobra Saül kier a maté. Rey i su soldánan a buské, ma Dios a protega su sirbidor. A socede mes koe dos bez Saül a cai den manoe di David.

Un dia rey a bai sconde su curpa den un cueba grandi i hundoe di un baranca pa droemi un poco. David tabata scondí den e mes lugar. Es ora ai e hendenan koe tabata huntoe coen'é a bisé: „Esaki ta e dia ai koe Senjor a papia coe bo: „„Lo Mi entrega bo enemigoe den bo manoe, pa bo haci coen'é manera ta gusta bo.”” Ma David a responde: „Senjor warda mi pa mi pone manoe na ungado di Senjor.”



El no a haci ningun maloe, ma el a corta solamente pida di Saül su mantel. I ora su hendenan kier a mata rey, David a boela para meimei di nan i Saül i el no a permiti pa ningun di su hendenan mata rey.

Un otro biaha Saül a larga traha un campamento na pia di un baranca i a droemi ai meimei

di su soldánan. Anochi David coe Abisaí, un di su heroënan di mas balente, a pasa poco-poco meimei di su soldánan na sonjo i a jega te na tent di rey. Rey tabata droemi den su hamaca, su lanza i su beker tabata banda di djé. Abisaí kier a tras-pasa Saül coe su spada; ma David a cohe su mânnan tene i a bisé: „No maté; pasobra ken lo pone mân na curpa di ungado di Senjor i keda sin picar?” David a cohe su lanza i su beker koe tabata na su cabez i nan a bai coe nan.

Su manecé ora David a hajé trobe for di peligro riba baranca, el a grita coe boz duroe: „Abner! Bo no ta responde mi, Abner?” „Ta kende bo ta,” Abner a puntré, „koe ta stroba sosiego di rey?” I David a contesté: „Bo ta e homber koe no tin su igual den Israël; pakiko anto bo no a warda bo senjor i rey? Un hende a bini den bo campo pa mata rey, bo senjor. Bo no a haci bon; bai mira oenda lanza i beker di rey ta, koe tabata na su cabez?”

Es ora ai Saül a lamanta i tendiendo loke a socede, el a grita: „No ta boz di mi jioe David koe mi ta tende?” „Si, senjor i rey”, David a contesté. Awor Saül a pidi David pordon; ma David no a sigui Saül, pasobra e tabatin experiencia di ki liher su coerazon sâ troca.

3. Filistéonan a bolbe toema arma contra Saül, koe, mirando un ehército grandi bini pa ataké, a spanta; el a consulta coe Senjor, ma Senjor no a contesté. Es ora ai el a toema un propósito detestabel. El a bai consulta coe un hacidor di brúha, koe tabata biba na Endor. El a bai cerca djé anochi disfrazá i a ordené pa haci Samuël, koe a moeri poco dia pasá, parce su dilanti.

Ma na lugar di un poptji, koe e hacidor di bru-

ha kier a moenstra Saül, pa orde di Dios Saül a mira un venerabel anciano tapá coe un mantel. Tabata Samuël i el a bisa Saül: „Pakiko bo ta inkieta mi, pakiko bo ta puntra pa mi, ya koe Senjor a kita mân caba for di bo? Majan abo i bo jioenan lo ta cerca mi.”

E hacidor di brúha a hui bai, ora el a mira e cos henteramente riba su poder socede. Saül a spanta terribel i a cai abao na suela sin forza pa lamanta, ya koe cuater dia el no a come un pida pam; ma como el a haja un poco animo trobe, el a bai e mes anochi jen di terror na su campamentoe.

Ma mardugá batalja a coeminza riba ceroenan di Gelboë. Israëlitanan a haja un derrota completa i nan a hui. Jonathas i su otro roemannan a moeri i Saül tabata gravemente heridá. Temiendo di cai den manoe di enemigoe, el a manda su mucha di maté, ma como el no kier a haci esai, Saül a saca su spada, el a larga su curpa cai riba djé i el a moeri un morto desgraciado.

Ora David a tende morto di rey i di su amigoe Jonathas, el a kibra su bistir na sinjal di duele, jorando sinceramente. El no a corda mas na toer e maloenan koe Saül a hacié, ma solamente na e morto tristoe di rey di Israël i di su amigoe intimo, kende su amor i fieldad el a spera di por a recompensa un dia.

Filistéonan a hanja morto di Saül i a kita su cabez for di su curpa. Nan a kita su arma i a camna toer camina coen'é bao di gritoe di victoria. David, pa moenstra un bez mas com e tabata stima su enemigoenan, a mata nan koe a herida Saül i a haci mashá beneficio na e ciudad di Jabes camina nan a dera Saül.

Larga nos sinja for di ehempel di David, di tene respet pa toer hende koe Dios a doena autoridad riba nos. Na Dios sol ta toca di toema benganza. Nos como berdadero discipelman di Cristoe mester paga maloe coe bon.

 XXIX.

**1. Reino di David 2. Lamamentoe di Absalon.
3. Morto di David.**

1. Despues di morto di Saül, David a bira rey di Israël; es tempoe ai e tabatin 30 anja. El a konkista ciudad di Herusalem, el a traha un palacio riba seroe di Sion, i el a rondona e ciudad coe muraja, i a hacié capital di su reino. E kier a hiba Arca tambe ai. E garoshi, koe tabata hiba e Arca, a coeminsa bira un banda na camina.

Oza a saca su mân p'é tene es Arca p'é no cai, i mes momento el a keda morto. David no kier a



sigui hiba Arca mas aleuw i a larga nan poné den cas di un Levita, i tres luna despues David a larga nan hiba es Arca na seroe di Sion coe manifestacion di hubilo extraordinario.

David tabata feliz den toer su gera i a vence toer su enemigoenan; ma su reino lo a haja un exito mas feliz ainda, si l'e no a cai den picar grandi.



Ora profeta Nathan a moenstra rey su picarnan grandi, David a reconoce su falta i a pidi Dios pordon mes ora, no coe un contricion fingido, ma di henter su coerazon, i Dios a pordoné mes ora; ma sin embargo durante su bida el a hanja mas há desgracia i pena di sufri como penitencia di su picarnan.

2. David tabatin un jioe, jamá Absalon, koe a causé tristeza di mas grandi. Codicioso riba poder di su tata como rey di Israël, el a lamanta contra su tata David, i a manda un parti di pueblo aclamé pa rey. David coe su sirbidornan fiel mes ter a hui for di Herusalem i pasa Jordan. El a drama lagrima ardiente riba bida maloe di su jioe.

Entretanto Absalon a reuni un ehército grandi.

David a manda su ehército contra e jioe rebelde, i a pidi toer hende pa salba bida di su jioe.

Den un mondi grandi batalja a coeminza denter ehército di Absalon i di David. Absalon a perde i e sol a hui riba un mula. Di golpi el a sinti, koe su cabeinan a pega den un paloe i e mula a

sigui corre numa, i Absalon a keda cologá mei-mei di cieloe i tera. Joab, oficial di David a jega acerca i a pusha tres lanza den e coerazon ingrato i a larga nan tira su morto den un buracoe.



David a jora hopi tem largoe morto desgraciado di su jioe. Jorando el a sclama: „Mi jioe Absalon, Absalon mi jioe; ai, mara mi por a moeri pa bo, Absalon mi jioe!” Porfin el a bolbe bai Herusalem i nan a ricibié ai

coe mashá legria, i el a drenta ciudad coe victoria.

3. Despues di tantoe gera David por a reina na paz riba Huda ó Israël i Senjor a hacié próspero, haciendo e semper mas i mas grandi i glorioso.

Un dia el a hanja un pensamentoe ambicioso i el a larga conta toer su pueblo p'e broma coe su poder. Senjor a keda malcontentoe coe esai i a doené un di es tres castigoenan p'e scohe pa su picar: hamber, gera ó peste.

David a scohe peste, pasobra el a prefera di cai den manoe di Senjor, i no den manoe di hende.

Peste a bini i a caba coe Israël. I e castigoe lo no a caba, si David coe su oracionnan, coe su penitencia i coe su sacrificionan lo no a placa rabia di Senjor.

Despues di es azota, rey a ocupé únicamente coe bienestar di pueblo i coe obra di piedad. E

mes lo a traha tempel di Senjor, si profeta lo no a tahé, pa via koe den gera su manoenan tabata manchá coe sanger.

Por último, siendo un anciano di 70 anja caba i sintiendo, koe fin di su dianan ta acerca, el a eligi su jioe Salomon pa su sucesor. David a jama Salomon cerca djé i dici: „Mi jioe, Senjor ta coe bo i sea feliz i traha un cas pa Senjor bo Dios, manera El a bisa koe lo bo haci. Senjor doena bo tambe sabiduria i sentir pa bo reina riba Israël i pa bo cumpli coe ley di Senjor bo Dios”.

Poco tem despues David a moeri na paz. David tabata un homber segun coerazon di Dios, pasobra den Dios el a pone toer su confianza.

El a stima tambe música i a compone cantica i salmo di un boeniteza extraordinario. El a profetiza tambe, pasobra el a mira i pronostica mucho cos di Mesias i toer cos a cumpli. Ma loke a hacié mas glorioso, ta, koe Dios kier a larga Hesus su jioe Dibino nace for di su familia.

Principalmente muchanan no mester sigui ehempel di Absalon. E jioe malagradecido, cologá coe su cabeí na un paloe i traspasá coe tres lanza, ta bisa toer mucha: „Ai di e mucha koe ta lamanta contra su mayor i ta hiza mân pa su tata i mama”

David ta un figura boenita di Cristoe. David a nace na Bethlehem, Cristoe tambe. Den su hubentud David a warda carnernan, Cristoe ta jama su mes „Bon Wardador”. David tabata un gran profeta i un gran rey, Cristoe a inspira profetanán i tabata Rey di toer reynan. David a pasa e rioe chikitoe Cedron pa bai seroe di Olyfi jorando amargamente, Cristoe a camna e mes camina coe tristeza di mas grandi anochi di su pasion. David a vence su enemigoenan i a regresa coe victoria na Herusalem, Cristoe a vence toer su enemigoenan i a subi coe gloria na Cieloe.

XXX.

1. Salomon. 2. Sabiduria di Salomon. 3. Tempel.

1. Despues di morto di David, su jioe Salomon a bira rey. El a stima Dios sinceramente i a sigui toer mandamientoe i conseho di su tata. El a consagra su mes coe henter su pueblo na Dios. Den anochi Dios a parce n'é i dici: „Pidi Mi toer cos koe bo ta desea.” Salomon a contesta: „Senjor Dios, Bo a larga bo sirbidor reina na lugar di mi tata David; mi ta un hoben chikitoe ainda; p'esai doena bo sirbidor un coerazon dócil, sabiduria i inteligencia pa mi huzga bo pueblo i distingui bon for di maloe.”

Dios a gusta mashá e súplica humilde i El a bisa Salomon: „Pasobra bo a pidi tal cos i bo no a pidi un bida largoe, ni rikeza, ni bida di bo enemigoenan, ma bo a pidi Mi sabiduria pa bo huzga bon, ata, Mi ta doena bo es koe bo a pidi i Mi ta doena bo tantoe sabiduria i inteligencia, koe ningun otro a haja, i koe despues lo no tin su igual. Ma es koe bo no a pidi tambe Mi ta doena bo: esta, rikeza i gloria, asina koe ningun otro rey antes ni despues lo ta igual na bo.”

Rikeza, sabiduria i poder koe Dios a doena na Salomon tabata grandi; su number a bira célebre na toer parti, i mashá stranjero a bin bishité.

2. Den promer anja di su reinado, Salomon a doena un prueba grandi di su sabiduria.

Dos muher tabata biba huntoe i cada un tabatin un jioe di poco edad. Un djé muhernan pa desgracia a primi su jioe mata anochi ora e tabata na sonjo. Ora e muher a lamanta el a troca su jioe morto pa e jioe biboe djé otro muher.

Mainta ora esaki a lamanta, el a haja e mucha morto banda di djé, i el a reconocé koe no ta su jioe. El a pidi e otro muher doené su jioe, ma esaki a nenga, diciendo, koe e mucha biboe tabata su jioe, i no e morto.

Nan toer dos a parce dilanti di Salomon, koe a tende nan. El a manda trece un spada p'é i a bisa su criar: „Parti e jioe biboe na dos, i doena cada un djé muhernan-aki mitar.” Es ora ai e mama berdadera djé jioe dici: „Senjor, mi ta pidi bo, doena e muher e jioe biboe i no larga nan maté.” Ma e otro a bisa: „El no sea ni pa mi, ni pa bo; larga nan partié na dos.” Anto Salomon a responde: „Doena e jioe biboe na e promer, i no maté; pasobra esai ta su mama.” E sentencia di rey a plama den henter Israël i toer a admira sabiduria koe Dios a doena Salomon p'e governa su pueblo.

3. Den di cuater anja di su gobierno, Salomon a coeminsa traha tempel di Dios. E tabata di mes forma koe tabernáculo antiguo, ma muchoe mas grandi. P'aden murajanan tabata cubrí coe paloe di cedro mashá precioso. Den e paloe nan a corta cherubinsonan, palmanan i toer sorto di adorno montá coe oro. Hasta su vloer tabata tapá coe platji di oro. Trahamentoe di tempel a dura siete anja. Es ora ai nan a consagré coe mashá luho. Sacerdotenan a pone Arca di Alianza den Santoe di Santoenan i asina nan a sali for di tempel, henter e ceroe a resona di e cantica di alabanza: „Alaba Senjor, pasobra Senjor ta bon.” Mes ora un nubia milagrosa a baha riba tempel. Salomon a hinca rodia i a reza coe boz altoe: „Senjor Dios di Israël, ningun hende ta igual na Bo, ni na cieloe ni na tera. Si cieloe di

cieloenan no por contene Bo, cuantoe menos es cas-aki, koe mi a traha pa Bo. Senjor, larga Bo wowonan ta abrí di dia i anochi riba es cas aki, i scucha oracionnan koe bo sirbidor i pueblo di Israël lo haci aki."



Despues koe rey a caba di reza hopi ainda pa suplica Dios di manda su bendicion riba toer hende koe lo bini pa pidié den su santuario i doena nan por-don i misericordia, ora lo nan jega den tempel coe un coerazon

arrepentido, a bini di repiente," un rayo di candela for di cieloe koe a kima es animalnan di sacrificio koe tabata riba altar. Toer Hudioen an a cai plat abao na tera e momento pa alaba Senjor.

Promer cos koe nos mester pidi Dios ta, pa nos cumpli coe obligacion di nos estado i fuera di esai loke nos mester pa biba feliz aki bao, pa biba despues den cieloe.

For di ehempel di Salomon nos por sinja cuantoe nos mester stima i honra nos misa, muchoe mas precioso koe tempel di Salomon; i tambe ki gustoso ta na Dios ora hende ta honré den su tempel, i koe e ta juda tanto koe el por pa su adorno i mantencion.

1. Ultimo anjanaan di Salomon. 2. Division di reino.

1. Bao di gobierno di Salomon pueblo a goza di prosperidad, trankilidad i paz.

Ma maske Salomon a ricibi di Dios un sabiduria milagrosa i tantoe gloria i rikeza, koe el a surpasa toer rey, toch el no a keda fiel na Dios, koe a doené tantoe beneficio. El a casa coe jioe di rey di Egipto i coe otro muhernan stranjera, contra mandamientoe di Dios, koe a taha Israëlitanan di no casa coe stranjeronan; esai a corrumpi su coerazon i el a cai den idolatría. Senjor, rabiá pa tal conducta, a bisa Salomon: „Pasobra bo a haci esai, i koe bo no a cumpli coe Mi preceptonan, lo Mi parti bo reino i lo Mi doené na un di bo sirbidor; ma un staca lo Mi larga pa bo jioe pa respet di bo tata David”.

Asina jen di gloria koe principio di gobierno di Salomon tabata, asina tristoe tabata su fin.

Es rey desgraciado a moeri despues di un gobierno di 40 anja.

2. Roboam a sigui su tata riba trono. Pa su conducta imprudente Roboam a perde mayor parti di su estado.

Salomon a pone un tributo grandi riba su pueblo, i como súbditonan no por a soporta un carga asina pisá, nan a bai cerca Roboam i a bisé: „Bo tata a pone un yugo mashá pisá riba nos; haci e yugo mas liher i lo nos somete nos na bo”. Ma Roboam a responde: „Bai i despues di tres dia boso bin tende contesta”.

Roboam a jama conseheronan bieuw di su tata i a consulta coe nan kiko e mester a responde

pueblo. Nan a consehé di percura di pacigua pueblo pa nan keda fiel n'é.

Roboam no a gusta conseho djé ancianonan i el a jama un reunion di hobennan na su corte.

E hobennan sin huicio a bisé, koe el no mester larga pueblo dominé, ma e mester coeri coe nan i pone mas peso riba nan pa nan no bolbe bin keha mas.

Roboam pues, rechazando e conseho sabí djé ancianonan, a sigui e conseho loco djé hobennan i a contesta pueblo coe palabra duroe, nengando nan súplica coe palabra insolente.

Pueblo awor a lamanta; diez staca a lamanta contra Roboam i nan a scohe Jeroboam, sirbidor di Salomon, pa rey.

Dos staca sol, esta: di Huda i di Benjamin, a keda fiel na Roboam.

For di es tempoe reino hudaico tabata partí na dos: reino di Israël i reino di Huda. Herusalem a a keda capital di Huda i Samaria a bira despues capital di reino di Israël.

Ehempel di Salomon ta sinja nos, koe no ta basta di coeminza bon, pasobra solamente hende koe ta persevera te na fin lo ta salvá.

Roboam ta un ehempel pa spierta toer hende di no haci cos di sin sentir.

Spiritu Santoe ta bisa: No rechaza conseho di hende bieuw, pasobra hende bieuw lo sinja bo bira sabí i inteligente.

XXXII.

1. Reino di Israel. Jeroboam 2. Acab. Profeta Elias. 3. E biuda di Sarepta.

1. Jeroboam tabata promer rey di Israël. Asina el a bini na gobierno, el a taha toer su súbditonan di no bai Herusalem pa ofrece sacrificio na Dios den Tempel di Huda, ma di keda na nan mes tera di Israël pa ofrece sacrificio na Dios. P'esai el a larga traha dos bicé di oro: un na noord i otro na zuid di su reino pa reuni pueblo rondó di nan.

Un dia mientras Jeroboam mes tabata ofrece sacrificio na es bicénan di oro, un profeta a bini cerca djé. Es profeta a pronostiké koe lo bini un rey di Huda koe lo mata sacerdotenan di dios falsoe riba e mes altar oenda awor nan ta pone censia ariba.

E profecia a haci rey rabia terribel; el a saca mân na e profeta i a grita: „Cohé.” Ma na e mes momento su braza a bira stijf i e altar a plama for di otro. Es ora ai Jeroboam a suplica profeta p'e pidi Dios p'é. Profeta a haci esai i rey a bolbe haja su salud. Ma rey no a mendra su bida. Asina hopi bez Dios a manda su profetanan pa spierta nan pa sigui berdadero culto.

Es profetanan - aki tabata homber koe Dios a jena coe su spiritu, comunicando nan cosnan scondí i tambe cos futura, manifestando su boluntad pa nan boca; tal profetanan tabata Elias, Eliséo i hopi otro. Nan tabata biba sol i separá for di otro hendenan, den pobreza i penitencia; nan mester a spierta rey i pueblo pa nan cumpli coe ley di Dios i lamanta nan pa haci penitencia i bolbe na camina di birtud.

2. Di seis rey di Israël tabata Acab. E tabata rey di mas maloe i di mas impio di toer su antecesornan. El a traha na su capital Samaria un tempel pa dios falsoe Baäl, i el a haci idolatríá di mas escandalosa aiden.

Un dia profeta Elias a bai cerca djé i a bisé : „Asina berdad koe Jehova ta Dios di Israël, lo no cai ni awa ni serena den anjanan koe ta bini, sino te ora mi bisa.”

I tabatin asina tantoe segura i hamber durante tres anja koe ni un gota di awa a cai for di cielo. Fuentenan a seca, coenucoenan a bira secoe-secoe ; henter tera di Israël tabata den grandi desolacion pa sed i hamber, koe nan a sufri.



Acab a trata pa mata e profeta na scondi, ma profeta a retiré den un desierto. Ai el a bebe awa di dos fuente i Senjor a alimenté pa medio di algun páhara, koe toer mainta i toer atardi a trecepam coe carni p'é.

Despues di algun tem e fuente a seca i es ora ai Dios a manda profeta cerca un biuda na Sarepta. Profeta a jega ai net e muher tabata piki paloe. Elias a pidié poco awa i un pida pam. El a responde : „Mi no tin pam ; ma solamente un poco harinja den un barril chikitoe i un poco azeta den boetishi.” Elias a responde :

„No teme; pasobra e harinja den e barril i e azeta den boetishi lo no bira mas poco, te ora Senjor lo manda awaceroe.”

I asina a socede. E barril no a bira bashí i e azeta no a bira mas poco, casi tres anja largoe. I ora jioe homber di es biuda a moeri, profeta a pidi Dios i el a resucito e jioe.

Den profeta Elias nos ta mira, koe Dios ta proteha su sirbidornan. El ta waak riba nan bida i Esa juda nan den toer peligro

XXXIII.

1. Sacrificio di Elias. 2. Naboth. 3. Morto di Acab i Jezabel 3. Elias a subi na cieloe.

E segura a dura tres anja i tres luna, ora Elias a bini cerca Acab pa moenstré i henter pueblo, koe no e dios falsoe Baäl, ma Jehova ta e berdadero Dios biboe.

„Mi sol a keda como profeta di Jehova: profetanan di Baäl ta 450; larga nan trece dos bué pa mi, larga nan mata un pa nan, corta na pida i pone riba paloe, ma sin pone candela abao; i lo mi haci mescos. Invoca boso diosnan anto i lo mi invoca nomber di mi Dios; i e Dios koe ta contesta coe candela, esai lo ta Dios.” Toer pueblo a contesta es ora ai: „Esai ta un bon proposicion.”

E profetanan di Baäl a traha un altar, nan a mata un bué i despues di a drecha pidanan destiná pa sacrificio nan a poné riba paloe; ma Elias

a waak bon pa nan no bini coe candela. Awor nan a coeminza grita: „Baäl scucha nos.” Ma candela no a bini for di cieloe.

Awor Elias a bini, el a traha un altar i un geut rondó di djé, el a kap un bué na pida-pida i a pone nan riba paloe. Awor el a larga basha awa te tres bez riba e paloenan i asina tantoe koe e geutnan a jena jen.

Awor Elias a reza: „Senjor Dios di Abraham i di Isaac i di Israël, moenstra awe koe Bo ta Dios di Israël, i koe mi ta bo sirbidor, koe a haci toer esai segun bo precepto”. I ata, un rayo di candela a baha for di cieloe i a kima e pidanan di bué, e paloenan, hasta piedra di altar i el a seca toer awa mes den geut.

Awor pueblo a grita: „Senjor ta Dios, Senjor ta Dios.” I nan a mata e 450 profeta falsoe i Dios a manda un awaceroe abundante pa e pueblo combertí.

2. Algun anja despues Acab i su muher impia Jézabel a comete un crimen abominabel.

Nabot tabatin un boenita hoffi di druif. Acab tabata kier e hoffi p'e traha di djé un hoffi di berdura; ma Nabot no kier a bendé ni troké. Awor Jézabel a larga acusa Nabot falsamente koe el a blasfema Dios i rey. Nan a condena Nabot na morto, i nan a piedré. Awor Jézabel a bisa rey: „Toema posesion di e hoffi di Nabot, pasobra é no ta na bida mas, ma el a moeri.”

Ora Acab a bai p'e toema e hoffi, Elias a sali contré i e dici coen'é: „Asina Senjor a papia: Na e lugar-aki camina cachornan a bebe sanger di Nabot, lo nan lembe bo sanger tambe, i lo nan come Jézabel su carni den e hoffi.”

3. Tres anja despues rey a sali atrobe p'e bai

bringa. Acab tabatin mashá miedoe. El a kita toer su bistir di rey i el a bisti como un soldá ordinario. Coe esai el por a bien scondé pa hende, ma no pa Dios. Un flecha a heridé sintando den un garoshi, i ora nan a limpia e garoshi, cachornan a bini pa lembe su sanger

E rey nobo a larga cohe Jézabel impia, i nan a tiré for di bentana di su palacio abao na caja.

Cabainan a machica su curpa i cachornan a comé

4. Ora Elias a sinti koe fin di su dianan aki



ba ta cerca di jega, el a bai camna coe su discipulo Eliséo na playa di Jordan. Coe su mantel el a dal awa di e rioe, i e awa a parti na dos, di manera koe nan por a pasé pia secoe. Ora nan a jega na otro banda di Jordan, un wagen ardiente

coe cabainan di candela a bini. Elias a drenta e wagen i meimei di un warwaroe el a subi na cielo. Su mantel el a tira abao pa un recuerdo pa su discipulo Eliséo.

Tin solamente un Dios berdadero i no mas E Dios nos ta adora den tempel di Senjor, den nos nisa, camina Dios mes ta biba riba altar. No haci maloe na bo próhimo pa Dios no castiga bo coe e mes maloe koe bo a haci bo roeman.

1. Profeta Eliséo. 2 Naaman. 3. Jonas
4. Fia di Reino di Israel.

Ora profeta Eliséo a bai un dia di Jerico na Bethel, un troepa di mucha malbado di Bethel a topé, nan a bofon di djé i a zoendré pa cabez pelá.



Profeta a menaza nan coe castigoe di Dios pa motiboe koe nan a menosprecia ministro di Dios.

Mes ora dos oso a sali for di mondi i a mata 42 di nan.

Profeta Eliséo a haci tambe un milagro grandi pa un pober biuda, koe no por a paga su debe.

E no tabatin nada mas na cas, sino un poco azeta. Eliséo a bisé: „Bai fia cerca toer bo bisinjanan barril bashí, no poco. Drenta anto bo cas, cera bo porta ora bo i bo jioenan homber ta na cas i jena toer e barrilnan.” E biuda a haci manera profeta a mandé i Dios a aumenta su azeta asina tantoe, koe el por a jena toer e barrilnan.

Es ora ai Eliséo dici: „Bai bende awor es azeta i paga bo debe, sobrá ta pa bo i bo jioenan.”

2. Un cierto dia un shers luhoso a keda para dilanti cas di Eliséo. Naäman, hefe di ehército di rey di Siria, tabatin lepra i el a bini cerca e profeta p'e hanja curamentoe. Eliséo a larga bisé:

„Bai i laba bo curpa siete bez den Jordan i lo

bo bira limpi". Naäman a haci esai, i el a bira limpi. Es ora ai el a ofrece profeta mashá regalo ricoe, ma profeta no kier a acepta nada.

Ora Naäman a bai, Giëzi, criar di Eliséo, a bai ketoe-ketoe tras di djé i dici coen'é: „A jega dos discípulo cerca profeta, i el ta pidi bo un talento di plata i dos bistir di fiesta pa nan.”

Naäman a doené dos talento i dos criar a carga es tesoro hiba p'é. Anochi ora Giëzi a jega cas, Eliséo a puntré: „Oenda bo a sali?” E ganjador a contesté: „Bo sirbidor no a bai ningun camina”. Eliséo a bisé: „Awor bo tin plata i panja; ma lepra di Naäman tambe lo bo hanja.” Mes ora e desgraciado a hanja lepra.

Un dia profeta a resucita jioe di un muher, koe a hacié mashá fabor. Hasta despues di su morto Dios kier a glorifica su sirbidor, pasobra un dia koe nan a dera un morto den graf djé profeta, asina e morto a topa coe wesoe di Eliséo, el a bolbe hanja bida i el a lamanta.

3. Mas ó menos e tempoe ai tabata biba un profeta jamá Jonas. Como pueblo di Ninivé a comete masha delito, Senjor a manda profeta Jonas bai predica penitencia na es ciudad. Ma e profeta tabatin miedoe koe lo nan maté, i el no a obedece, ma el kier a bai un otro tera. El a fleta un barcoe na Joppe i el a sali pa Farro di Cilicia.

Senjor a manda un biento mashá fuerte riba lamar, i a lamanta un tempestad asina furioso, koe e barcoe a bira di un banda na otro; i marinieronan tabata spantá i ansiá, ma Jonas tabata droemi sosegá. Como cada bez lamar a bira mas furioso, Jonas a spierta; nan a tira suerte pa sabi ken por ta causa di e mal tempoe i suerte a cai riba Jonas, koe a confesa su culpa, i koe a bisa,

koe ta su desobediencia a causa e mal tempoe.

„Tira mi na lamar i tempoe lo pasa.”

È marineronan a tiré na awa i unbez lamar a bira calmo. No obstante esai Senjor a salba Jonas milagrosamente. Un piscar di un tamaño monstruoso a cohé, el a gulié sin comé i tene biboe tres dia i tres anochi den su barica, i el a tira Jonas sano riba costa.

Awor sí Jonas a bai Ninivé i el a grita den



toer caja di es ciudad: „Cuarenta dia ainda i Ninive lo ta destruí.” Rey i pueblo a scucha na palabranandi profeta. Rey a baha for di su trono i el a bisti un sacoe i a tapa su cabei coe shinishi i a ordena toer hende

un ajuno di mas severo. Dios mirando tantoe penitencia a pordona e pueblo i no a manda e castigoe koe El a menaza e ciudad coen'é.

4. Israëlitanan, loebidando toer gracia i pordon koe nan a haja cada bez for di Dios, a bolbe cai den picarnan enorme. Awor Dios a manda Salmanasar, rey di Asiria na Israël, koe a cohe rey Ozea preso, a destrui nan ciudad Samaría i a hiba toer Israëlitanan como desterradonan for di nan tera.

Hesus a bisa Hudioenan: „Hombernan di Ninivé lo lamanta coe es generacion i lo nan condené, pasobra pa predicacion di Jonas nan a haci penitencia i mira, mas koe Jonas Esaki ta.”

XXXV.

Tobias na Asiria.

Israëlitanan koe Salmanasar a hiba catiboe na Asiria tabatin di sufri hopi. Muchoe bez nan no tabatin ni panja pa bistir; hopi di nan a moeri i nan a tira nan morto leuw for di ciudad, pasobra tabata tahá di no dera nan, i warawara i otro animalnan feroz tabata come nan morto.

Den e catiboenan tabatin un homber mashá virtuoso jamá Tobias. Den es tempoe ai el a doena prueba di su birtud grandi. E tabata fiel na ley dibina i menos infeliz koe e otronan, pasobra Senjor a haci koe rey di Asiria tabata kier e mashá bon.

El a bishita pueblonan, a consola su roemannan catiboe, spiertando nan di keda den camina di birtud. El a parti toer su bien pa esnan, koe tabata den necesidad, doenando coeminda na nan koe tabatin hamber, judando esnan koe tabatin falta di panja, derando mortonan na riscoe di su mes bida.

I ora el a tende koe morto di un ó otro Israëlita no tabata derá ainda, el tabata keda hasta sin come p'é bai cohe e morto na scondir, wardé den su cas, pa doené un deramentoe piadoso, sin koe nan sabi.

Un dia koe el a dera un Israëlita, el a jega

cas toer cansá, el a pone su cabez contra mura-ja i el a pega sonjo. Mientras el tabata droemi, algun sushi di neshi di páhara a cai den su wo-wo i a hacié ciego.

Dios a permiti tal desgracia cai riba su sirbidor pa un berdadero ehempel di penitencia digno di ta imitá. Tobias a wanta su ciegedad coe asina tantoe paciencia, koe hamás a sali algun keho for di su boca; su zelo pa gloria di Dios no a mengua tampoco; ma alcontrario, semper e tabata soemetido na Boluntad Dibina.

Creyendo koe fin di su bida tabata acerca, el a jama su jioe Tobias cerca djé i el a doené consehonan sabí i afectuoso.

„Mi jioe, scucha botata i warda su palabranan den bo coerazon. Ora Dios lo a toema mi alma, lo bo dera mi culpa. Lo bo honra bo mama toer dia di bo bida. Tantem koe bo ta na bida, tene Dios dilanti bo bista; haci limosna for di loke bo tin; si bo tin hopi, doena hopi; si bo tin poco, parti tambe coe gustoe for di e poco koe bo tin. Warda bo di consenti den picar i keda fiel na Dios su mandamientoenan. Busca semper conseho cerca hende sabí.” Tobias a priminti su tata koe l'e sigui su consehonan te dia l'e moeri.

Ma Dios, koe tabatin muchoe consuelo ainda prepará p'é, no a permiti koe su sirbidor Tobias lo a moeri es tempoe ai.

Larga nos sinja di Tobias pa ta soemetido na Santa Boluntad di Dios, maske Dios ta manda cruz pisá pa nos. Ehempel di mayor ta felicidad di jioe.

XXXVI.

Jioe di Tobias.

Tobias anciano a cai den pobreza grandi, el a jama su jioe i el a bisé: „Busca awor un companjero di biaha, koe por bai coe bo cerca Gabelo, pa cobré e placa koe mi a jega di fié.”

E jioe Tobias a sali afor i a contra un hoben boenita, modesto i afabel, koe tabata bistí coe panja di biaha. Tabata Arcangel Rafaël; ma Tobias no tabata sabi. El a coemindé coe mashá carinjo i el a puntré: „Bo conoce camina pa bai Media?” I Angel a respondé: „Mi conoce e camina mashá bon.” Tobias a drenta p'aden i el a bisa su tata esai. Anto su tata Tobias a larga jama e hoben p'aden i el a puntré: „Bo por companja mi jioe te na Rages?”



E angel dici: „Lo mi companja bo jioe hibé aja i trecé atrobe bon di salud.”

„Feliz biaha,” Tobias a responde. „Dios sea coe boso na boso biaha i koe Su Angelnan companja boso.” Despues e hoben Tobias a despidi di su tata i mama i el a bai. Anochi e dos biaheronan a jega na e rioe Tiger. Tobias kier a laba su pianan ora un piscar mashá grandi a bini riba djé pa cohé i gulié.

Tobias a spanta, ma Angel a bisé: „Cohé i halé trecé riba tera.” Nan a come un parti di e piscar; ma Tobias mester a warda coerazon, gal i higrá djé piscar.

Un dos dia despues nan a jega na lugar camina Raguel, pariente di Tobias tabata biba. Raguel a ricibi nan coe mashá carinjo i a casa Tobias coe su jioe Sara.

Tobias a fica dos seman cerca Raguel, mientras e Angel a bai Rages cerca Gabelo, pa cobré loke e debe.

Ora e diez cuater dianan a pasa, Tobias a regresa cerca su mayor, Raguel a doené mitar di su posesion i a despidi di su jioe. Na camina Tobias a bai p'adilanti coe su companjero pa nan jega cas mas liher. Toer dia su mama Ana a subi un ceritoe pa weita si su jioe no ta bini. Alafin el a weité di aleuw. Asina liher koe el tabata por, el a corre bai cas pa hiba e nobo alegre pa e homber anciano. E tata bieuw a lamanta, el a larga nan hibé bai contra su jioe, i tata i mama i jioe a braza otro di alegria. Asina nan a gana cas, nan a alaba i gradici Dios.

Despues e hoben Tobias, manera Angel a bisé a toema gal di e piscar, a hunta wowo di su tata coen'é, i mes ora su tata a hanja su bista

trobe, i e por a mira su jioe stimá. Toer a doena gloria i alabanza na Dios.

Siete dia atras Sara tambe a jega coe su criari i bestianan i nan a celebra fiesta siete dia largoe.

Tobias i su jioe kier a recompensa e companjero di biaha pa e bondad, koe el a haci nan.

Nan a pidié p'é acepta mitar di toer loke nan tabata posede.

Ma es ora ai Angel a manifesta kende e tabata i dici: „Ora bo tabata reza coe lágrima i koe bo tabata dera mortonan, mi a hiba bo oracionnan dilanti di Senjor, pasobra mi ta angel Rafael, un djé sietenan, koe ta para dilanti trono di Dios.

Ma awor ora a jega koe mi ta regresa cerca El koe a manda mi.”

I Angel a disparte. Tata i jioe a cai plat abao na tera i nan a adora Dios tres dia largoe.

Tobias a biba 42 anja mas i el a moeri den temor di Dios na edad di 102 anja. Despues di morto di su tata, e jioe Tobias a bai biba cerca su suegro. El a alcanza edad di 99 anja. Toer su jioe- i nietonan a camna den camina di birtud i tabata gustoso na Dios i hende.

Mescos koe un Angel a guia Tobias den su biaha i a libré di toer peligro, mescos un Angel koe nos ta jama Angel-wardador ta companja nos toer den nos biaha di es bida aki. Feliz ejoenan, koe ta sigui ehempel di Tobias.

XXXVII.

Judith.

Rey di Asiria a manda su oficial Holofernes coe un ehército enorme pa somete toer pueblo n'é.

El a destrui toer templo koe el a topa den su camina, pasobra rey di Asiria tabata kier pa toer hende adora e sol como Dios.

Ora Hudionan a tende esai, nan a pidi Dios pa E protega su ciudad santoe i su tempel contra es pagano salbahe. Gran-sacerdote tambe a manda nuncionan na henter reino djé diez stacanan, pa lamanta pueblo pa nan defende nan coe un firme confianza den Dios.

Holofernes a bira furioso, ora el a tende esai.

Mes ora el a marcha coe su soldánan i a sitia e ciudad fuerte di Bethulia.

E ciudad tabata hanja awa di bebe solamente tor di ún fuente, koe tabata p'afor di su murajanan. Holofernes a larga cera e fuente, pa sed forza habitantenan pa entrega e lugar. Despues di binti dia nan no tabatin awa mas i tabata sufri un sed asina terribel, koe nan a bai cerca gobernador pa pidié pa entrega ciudad na Holofernes. Gobernador a contesta: „Tene coerashi, roemannan, i spera ainda cincoe dia riba Dios su misericordia. Si den cincoe dia no bini judanza, lo nos haci segun boso deseo.”

Es tempoe ai tabata biba na Bethulia un biuda santa, jamá Judith, koe tabata conocí den henter es ciudad, i honrá pa motiboe di su gran debocion i birtud. El a reza i roga Dios di dia i anochi, el a juna i haci penitencia i Dios a participé, com lo E libra su pueblo.

El a lamanta ancianonan di pueblo pa tene animo i confianza i a pidi Dios di bendiciona su projecto.

Despues, adorná coe su bistirnan di mas ricoe i companjá di un criar, el a sali un anochi for di ciudad i su manece el a jega na campamento di Holofernes. Soldánan, koe a topé, a hibé na tent di nan hefe, koe admirá di su boeniteza a ricibié faborabel. El a kere koe el a bini pa traiciona ciudad i a doena orden, koe e por dren-ta i sali campamento segun e kier.

Cuater dia despues Holofernes a doena un gran fiesta. Ora tabata laat den anochi caba i koe combidadonan a bai, Holofernes, koe tabata bura-chi di binja, a tira su curpa riba cama i a pega sonjo duroe.

Judith a keda e ora den tent. E tabata para dilanti cama di Holofernes i tabata reza na silencio: „Senjor mi Dios, doena mi forza na es momentoe aki”. Anto el a kita e spada, koe tabata cologá na



cama di e homber, el a bolbe pidi Dios forza i el a corta cabez djé Holofernes impío for di su curpa. Su criar koe a tene warda p'afor, a sconde e cabez purá-purá den un sacoe. Liher toerdos a sali for di campamento i a bolbe bai Bethulia. Judith a moenstra pueblo cabez di Holofernes i dici: „Alaba Dios, pasobra Dios ta bon, eterna su misericordia.”

No por bisa coe cuantoe alegria nan a ricibié. Habitantenan di ciudad a cai di golpi riba Asirionan. Ora esakinan a mira, koe nan a mata nan hefe, nan a hui, jen di spantoe, i a larga nan arma i tent atras. Israëlitanan a poersigui nan, haciendo gran victoria i toemando rikezanan inmenso den campamento. Despues henter pueblo di Bethulia a bai Herusalem, pa ofrece ai sacrificio na Dios pa es salvacion milagrosa.

Judith ta un imagen di Santísima Birgen Maria, Mama di Redentor. Pa medio di Hesus Maria a machica cabez di serpiente infernal. Satanas; p'esai Iglesia ta papia di Maria e palabra koe pueblo di Herusalem a papia coe Judith: „Bo ta gloria di Herusalem, legria di Israel, honor di nos pueblo.

XXXIII.

Reino di Huda.

Reino di Huda tabata mas feliz koe reino di Israël i a dura mas di un siglo despues di caida di reino di Israël, pasobra muchoe di su reynan i especialmente Josafat, Ezequias i Josias tabata piadoso i hustoe; p'esai Dios a bendiciona nan.

Josafat, di cuater rey di Huda a tumba toer imagen di dios falsoe, el a larga instrui pueblo den ley di Dios berdadero i e tabata dorná di tantoe birtud, koe hasta stranjéronan a venera su nomber.

Ezequias koe a biba muchoe anja despues, siguiendo consehonan djé gran profeta Isaias, a governa su pueblo coe mashá prudencia. El a tumba imagen di diosnan falsoe, el a habri tempel koe su antecesor a cera, i a drecha sirbishi di Senjor. Bao di su gobierno Sennacherib, rey di Asiria a cai riba Huda, i a blokea Herusalem. El a manda un carta jen di blastemia pa Hudioenan i aiden el a pone, koe nan no por scapa for di su mân.

Ora Ezequias a leza e carta, di tristeza el a kibra su panja. El a bai tempel i el a pidi Dios di moenstra su poder na es blasfemador.

Pa orden di Dios profeta Isaias a bai cerca rey i dici: „No teme, enemigoe lo no drenta den ciudad.”

E mes anochi un Angel a baha den campamento di enemigoenan i a mata 185.000 homber; rey a hui bai coe toer esnan koe a sobra.

Ezequias a cai den un enfermedad mortal i Dios a doené su salur trobe, coe promesa di biba 15 anja mas.

Na tempoe di Ezequias reino di Israël a perde su gloria i su bon nomber poco-poco. Despues di su morto a siguié e impio Manases i e sacrílego Aman. Denter toer rey koe a sigui despues, Josías tabata un koe a sirbi Dios semper coe toer su cocrazon. Su tres sucesornan tabata malbado.

E profetanan Jeremias i Joël tabata profetisa ruina di Herusalem, i sclabitud di Babilonia, exhortando rey i pueblo pa haci penitencia; ma pueblo i reynan tabata desprecia nan i tabata rechaza nan spiertamentoe serio.

Porfin Dios a permiti, koe Nabucodónosor, rey di Babilonia, a bin blokea Herusalem. E ciudad a jega den tal estado di miseria, koe no tabatin coeminda di ningun género, i hamber tabata reina asina terribel, koe nan tabata come hasta carni di hende mes.

Despues di un defensa obstiná di 17 luna Nabucodónosor a cohe Herusalem. El a tumba su murajan, a cende tempel i henter ciudad na candela, koe ni un piedra a keda riba otro. Nan a hiba e vasonan santoe na Babilonia i habitantenan koe no a cai den gera, nan a hiba nan como catiboe na Babilonia.

Esai a socede mas ó menos 600 anja promer koe Hesus a bini i tabata principio di un esclabitud di 70 anja.

XXXIX.

Esclabitud di Babilonia.

Jioenan di Israël no tabata muchoe duroe tratá na esclabitud di Babilonia. Rey a doena nan hopi libertad; si, hasta algun prosperidad. Hudioenan tabatin un propio gobierno i nan mes hueznan; denter di nan tabatin algun Hudioe ricoe mes.

Nabucodónosor a larga scohe for di jioenan di Israël, koe tabata na Babilonia, algun hoben boenita di curpa i mashá inteligente. Mester a instrui nan tres anja den toer ciencia, pa despues nan sirbi den su palacio. Den di nan tabatin: Daniël, Ananias, Azarias i Michaël. Rey a manda pa nan come e mes coeminda koe rey ta come; ma Daniël

i su tres amigoe nan birtuoso, koe tabata sigui fielmente ley di Moises, a suplica prefecto di palacio pa no doena nan sino awa coe berdura.

Ma e prefecto a bisa, koe e tin miedoe, koe si nan no come e coeminda di rey, koe lo nan bira flacoe i koe nan lo perde nan cabez. Ma e cuater hoben a papia tantoe coen'é te koe el a consenti di toema prueba pa diez dia, i ora el a mira koe nan no a bira mas flacoe, ma koe nan cara a bira mas gordo i mas boenita koe antes ora nan tabata come carni for di mesa di rey, el a sigui doena nan berdura.

Dios a recompensa nan pa es amor pa su ley i a doena nan asina tantoe sabiduria i inteligencia, koe despues di tres anja, ora nan tabata presentá na rey, el a declara koe nan ta diez bez mas sabí, koe e sabínan di henter su reino. El a halza Daniël pa hefe supremo di toer su sabínan i a pone su tres amigoe nan pa gobernador.

For di historianan di Daniel coe su amigoe nan bo ta mira, koe mortificacion i ajuno no ta haci tantoe daujo, manera mas parti di hende ta kere.

Esai ta cos koe ta pone hende pensa

XL.

Tres hoben den forno ardiente.

Nabucodónosor no tabata constante den su veneracion pa Dios; ma alcontrario el a bira soberbe asina tantoe, koe el a desea pa hende adoré manera Dios. El a larga traha un estatua di oro sesenta braza haltoe i a poné no leuw for di capital.

Na ora di bëndicion di es estatua toer hende haltoe di su reino mester tabata presente. E tres gobernadornan: Ananias, Azarias i Michael tambe tabata presente, ma Daniël tabata ausente. „Asina boso ta tende sona di trompet”, rey a larga bisa, „boso mester cai na roedia i adora es estatua i toer esnan koe no ta adoré, lo ta tirá den un forno ardiente”. Rey a doena un sinjal, música a coeminsa resona, i toer a cai na roedia pa adora es estatua di oro, fuera e tres amigoenan di Daniël.

Mes ora nan a bisa rey loke e tres gobernadornan a haci. „Ta berdad”, el a bisa, „koe boso no ta adora nos diosnan? Hincá roedia i adora es estatua, sino inmediatamente mi ta larga tira boso den e forno ardiente”. Nan a respondé:

„Nos no tin mester di doena contesta riba esai. Mira, nos Dios por salba nos for di e forno ar-



diente. Si E no kier haci esai, anto toch lo nos no venera bo diosnan falseo tampoco ni adora es estatua di oro."

Es ora ai Nabucodónosor a bira furioso i el a manda nan cende es forno siete bez mas cajente koe di coestumber. Vlam a subi coe violencia for di es forno i a jega haltoe na laria. Es ora ai nan a mara e tres hobennan i a tira nan den e forno; ma un Angel di Senjor a baha cerca nan den es forno ardiente.

E forno a manda calor terribel afor, ma den djé tabata soepla un bientoe frescoe. Candela no a haci nan ningun danjo; solamente e cabujanan koe nan a mara nan coen'é a kima. E tres hobennan tabata keire coe e Angel mei-mei djé vlamnan i nan tabata alaba i gradici Dios.

Nabucodónosor, koe for di su trono a mira toer e cos, a keda admirá, el a lamanta, el a corre bai na e forno, a habrié i el a papia:

„Sirbidornan di Altísimo, sali i bini". E tres hobennan a sali i e Angel koe a companja nan a bai cieloe atrobe. Ni un cabeí di nan cabez a kima.

Admirá Nabucodónosor a sclama: „Alabá sea boso Dios, koe a manda Su Angel i a salba su sirbidornan. No tin otro Dios koe por doena salbacion". E tres martirnan a hanja nan puesto honroso atrobe.

Rey Balthasar.

Ultimo rey di Babilonia ta Balthasar. Duranti sitio di Babilonia, rey a doena un gran fiesta pa hombernan di mas principal di su reino na honor di diosnan falseo. Despues koe nan a celebra fiesta henter dia i a bebe mashá binja, e rey impío a ordena pa nan trece e vasonan di oro i plata koe su tawela a horta den tempel di Herusalem.

Antes nan a haci uso di es vasonan santoe na ora di sacrificio di Dios berdadero, ma awor e sirbidornan impío di diosnan falseo a bebe nan binja for di nan na honor di nan diosnan falseo.

Bon Dios no por a keda sin castiga un sacrilegio asina terribel.

Meimei di es fiesta, den alegria di mas grandi, un manoe misteriosa a parce di repiente na muraña net dilanti di rey i el a skirbi es tres palabranan: *mane, thekel, phares*.

Mes ora alegria di fiesta a stop; toer a bira bleek manera morto i a tembla di ansia i di span-toe. Ningun no por a leza es palabranan milagrosa. Rey a larga jama hende koe sâ splica sonjo i haci bruha, ofreciendo premio grandi na esnan koe por bisa kiko es escrito ta nifica. Toer sabirnan di rey a bini, ma nan no por a leza es escrito tampoco ni splica su nificacion. Es ora ai nan a corda riba Daniel.

Rey a larga jama e profeta i el a bini. „Si bo por leza es escrito i splica mi su nificacion, lo mi larga bisti bo na purper, lo bo haja un cadena di oro pa cologa na bo garganta i lo bo ta di tres rey di mi reino.” Daniel a res-

ponde: „Warda bo regalonan i doena nan na un otro, ma es escrito lo mi leza pa bo i lo mi doena bo, o rey, su splicacion.” Caba Daniel a bisa rey sin ningun miedoe, ki impía i sacrílega su conducta tabata i el a caba coe espalabrananaki:

„Ata es escrito koe ta para airiba: *mane, thékel, phares*. I ata su splicacion: *mane, conta*. Dios a conta bo reino i a haci un fin n'é; *thekel, pisa*. Dios a pisa bo den balanza i bo tabata muchoe liher; *phares, parti*. Dios a parti bo reino i a doené na Meda i Personan.”

Rey a doena Daniel e premionan koe el a primintié; ma e mes anochi nan a cohe Babilonia i a mata Baltasar. Darío di Media a bira su sucesor.

Dios ta paciente, ma toch si un dia midir di husticia a jena, auto castigoe ta b'ni. No seinper Dios ta larga nuncia e castigoe p'adilanti, ma muchoe bez e ta cohe hende pecador ora e no ta corda, manera anzué ta cohe piscar.

XLII.

Dios falsoe Bel.

Rey Dario tabata stima profeta Daniel i a alzé te na dignidad di mas altoe.

Habitantenan di Babilonia tabata adora un dios falsoe koe jama Bel. Toer dia nan tabata drecha un gran comida riba un mesa di oro, koe tabata para dilanti di su imagen. Sacerdotenan djé Dios falsoe tabata ganja pueblo koe anochi Bel tabata come es coemindanan. Un ciertoe dia Rey

Darío koe tabata venera es idolo tambe, a puntra Daniel: „Pakiko bo no ta adora Bel?” Daniel a contesta: „Mi no ta adora diosnan koe hende a traha. Mi ta adora Dios biboe koe a cria cieloe i tera.” Rey a bisé: „Bo ta kere anto koe Bel no ta Dios biboe, bo no ta mira cuantoe e ta come i bebe toer dia?” Daniel a responde: „Bel no ta come, o rey, nan ta ganja bo; p'aden e ta di klei i p'afor e ta di koper. Nunca el a come nada.”

Es ora ai rey a rabia mashá i el a larga jama e setenta sacerdote di Bel i dici: „Si boso no bisa mi, ken ta come es coeminda, lo boso moeri; ma si boso doena mi prueba koe ta Bel ta come nan, anto Daniel lo moeri, pasobra el a blasfema Bel.” Daniel a bisa: „Koe socede manera bo a bisa.”

Atardi rey a bai coe Daniel na tempel. Sacerdotenan di dios falsoe a trece coeminda i dici: „Si majan mainta tempran Bel no a come toerescoemindanan, anto lo nos moeri.” Nan a bai i rey a pone coeminda pa Bel, i Daniel a strooi shinishi riba suela di tempel. Rey a cera porta di tempel i a pone su seljo riba djé.

Den anochi sacerdotenan a bini manera coestumber den tempel pa medio di un bodega, koe nan a lamanta su tapadera i nan a come i bebe toer cos, koe rey a pone pa Bel.

Su manece Daniel a bai coe rey na tempel mainta tempran. Nan a haja seljo henter i mesa di coeminda bashí. Es ora ai rey a sclama: „Grandi bo ta, o Bel, i no tin enganjo den bo.” Ma Daniel tabata hari i a moenstra na suela, diciendo: „Mira, ta ken su pia ta marca aki?” I rey a weita pianan di homber, muher i muchanan.

Anto rey a jama sacerdotenan coe nan muher i jioenan su dilanti, i ora nan a moenstré e bodega secreta, el a larga mata toer e ganjadornan. Daniel a destrui Bel i su tempel.

XLIII.

1. Dragon. 2 Daniel den cueba di leon.

1. Nan tabatin un dragon na Babilonia, koe nan tabata adora como Dios. Rey dici coe Daniel: „Di djé lo bo no por bisa, koe e no ta Dios biboe — pues adoré.” Daniel a responde: „Mi ta adora Senjor mi Dios, ma esaki no ta Dios. Coe bo permiso, lo mi maté sin arma.” Daniel a toema pek, cabei i manteca di bestia i a traha un pam coe nan, koe el a pone pa e monstuo come. E dragon a come toer i a rementa. „Ata, o rey” Daniel dici, „loke bo ta adora.”



2. Pueblo tabata mashá rabiá coe Daniel, pa-sobra el a mata nan dios, i nan a forza rey pa entrega nan Daniel.

Nan a tiré den un cueba koe siete leon furioso tabata adén. Nan no a doena nan coeminda, pa nan mata Daniel mas sigur. Ma Dios a cera boca di e leonnan i nan no a haci Daniel ningun danjo. Di siete dia rey a bai na cueba di leon, pa jora morto di Daniel. El a loer den e cueba i a weita Daniel sintá meimei djé leonnan. Rey a larga nan sacá Daniel for di cueba, i tira su enemigoenan adén; promer koe nan a jega abao, e leonnan a boela riba nan i mata nan.

Pa su bida religiosa Daniel tabata stimá cerca Dios i hende. Dios a judé den toer peligro. Corda bon: Religion no ta haci hende feliz den otro bida sol, ma tambe den es bida aki.

XLIV.

1. Esther i Mardogéo 2. Aman.

1. Bao di gobierno di Asuero tabata biba na Suza un homber, jamá Mardogéo. El a toema su sobrina Esther como jioe cerca djé.

Rey a gusta Esther asina tantoe, koe el a scohé pa la reina i el a pone corona riba su cabez. Ma nunca Esther a bisa koe e ta Hudioe, segun Mardogéo a tahé. Toer dia Mardogéo tabata bai na palacio di rey pa informa com ta bai coe la reina. Un dia el a tende dos sirbiente conspira coe otro pa mata rey. A investiga e asuntoe i a sali

koe ta berdad. A horca e dos sirbientenan i a nota es caso den historia di reino.

2. Rey tabatin un ministro stimá, jamá Aman, koe el a pone como hefe riba toer magistrado di su reino. Toer hende mester a moenstré honor real i hinca rodia p'é. Toer tabata haci esai, fuera Mardogéo, pasobra na Dios sol ta toca es honor. Es Aman orguljoso tabata furioso di duele i rabia, koe un Hudioe tabata nenga di doené es honor i el a resolve pa caba coe henter pueblo hudaica. El a pidi rey orden pa mata toer Hudioe di henter reino den ún dia i Rey a doenéle.

Den e calamidad Hudioenan a toema nan refugio cerca Dios coe oracion i ajuno. Mardogéo a conta Esther ki desgracia tabata menaza Hudioenan i el a pidié di bai cerca rey pa pidi gracia pa su pueblo. Ma a pasa trinta dia caba sin koe rey a manda jama Esther, i tabatin un ley koe toer hendé koe ta bai cerca rey sin ta jamá mester moeri. P'esai Esther a bisa Mardogéo: „Bai i reuni toer Hudioe koe bo ta haja na Saran i reza pa mi. Lo boso no come ni bebe durante tres dia i tres anochi, i mi tambe coe mi criarnan lo juna i despues lo mi bai cerca rey sin koe e jama mi, lo mi risca mi bida.”

Di tres dia a jega. Esther a bisti su bistir real i a bai na sala di rey, koe tabata brilja di oro i di piedra preciosa. Rey koe a mira Esther bini sin koe el a larga jamé a drenta rabia. Su wonan tabata lombra i Esther a spanta asina tanto, koe el a bai for di su tino i a cai den braza di su sirbiente. Ma mes ora Dios a troca coe razon di rey. El a baha for di su trono i a coeri bai cerca la reina, a toemé den su braza i a



bisé : „Esther no teme, lo bo no moeri. Kiko ta bo deseo?’ Esther a bini atrobe na su tino i a bisé : „Bin come coe Aman awe merdia cerca mi.” Rey a consenti coe su súplica i a primintié koe su manece tam-

be l’é bolbe bin come cerca djé.

Su siguiente anochi rey no por a droemi. Pa kita fastidio el a larga leza apuntenan di historia di reino p’é tende. Ora nan a jega na e lugar camina ta para, com Mardogéo a descubri conspiracion djé dos sirbientenan, rey a puntra : „Ki recompensa Mardogéo a haja pa es hecho di fieltad?” Sirbientenan a responde : „Ningun”.

Net Aman a drenta den sala, coe intencion di pidi rey pa larga horca Mardogéo. Rey a puntré : „Ki honor mester doena na es hende koe rey kier honra?” Aman a corda koe rey kier a meen e mes i dici : „E homber koe rey kier honra, mester ta bistí coe bistir real; e mester subi cabai di rey, coe corona riba su cabez, ceptro den mân; un di mas principal di corte mester tene frena di cabai i camna den toer caja di ciudad, sclamando : „Asina ta honrá e hende koe rey kier honra” i rey a bisa : „Bai liher i haci mes-cos coe e Hudioe Mardogéo, koe ta sinta na porta di palacio.”

E Aman orguljoso a obedece. Despues el a regresa toer tristoe na su cas i el a conta loke a pasé.

Mientra e tabata papia, sirbientenan di rey a bin jamé p'é bin come huntoe coe la reina. Na mesa rey a puntra un biaha mas: „Esther, kiko bo ta desea?” Esther a respondé: „Si mi a haja gracia den bo bista, o rey, spaar anto mi bida i bida di mi pueblo, pasobra nos ta condená pa ta matá, trapá i destruí.” Rey a puntra: „Ken ta asina atrevido di risca haci esai?” Esther a responde: „E mal enemigoe i traidor ta Aman.”

Aman a spanta ora el a tende es palabranan i el a cai na pia di la reina. Rey a bira bleek di rabia, el a lamanta for di mesa i a bai den hardin. Un di su sirbientenan dici: „Dilanti di Aman su cas tin un horca di 50 pia altoe, koe el a larga planta pa horca Mardogéo.” „Horca e mes na e paloe,” Rey a ordena. Algun minuto despues, Hudioenan a mira morto di nan enemigoe cologá na horca. Mardogéo a haja dignidad di Aman i a bira di promer despues di rey.

Kende koe alza su mes, lo ta humiljá, i kende koe humilja su mes lo ta alzá. Esther ta un imagen di Santísima Birgen, Reina di cieloe i di tera. Continuamente el ta papia na nos fabor cerca Dios. E ta nos bida i nos speranza.

Persecucion di Antioco.

Ora Hudioenan a bolbe bini Herusalem, esta: 70 anja despues koe nan a bai den esclabitud, nan a traha tempel i ciudad di nobo i nan a cera amistad atrobe coe Dios i nan a biba un bida pacífico i trankilo durante 300 anja, observando nan religion, teniendo un gran-sacerdote como hefe.

Ma Antioco Epifanes, rey di Siria, a propone pa caba coe religion hebrea; el a drenta Herusalem, a mata mashá hende i a haci cien mil di nan catiboe. El a profana tempel i el a horta vasonan santoe i toer otro tesoro; el a kita sacrificio hudaico, el a taha di santifica dianan di Sabbath i di fiesta, el a kibra i kima boekinan santoe i el a proclama un ley, koe toer hende mester adora diosnan falsoe. Toer koe a keda fiel na nan religion, a sufri martirio di mas cruel, promer koe nan a mata nan.

Mashá di nan a prefera mehor di moeri, koe di renuncia religion berdadera. Den nan tabatin Eleázar, un anciano venerabel di 90 anja, koe bordugonan a martiriza cruelmente, pasobra el a nenga di come carni di porco, loke ley di Hudioenan tabata taha. Su amigoenan, koe tabata kier e muchoe, a bisé den su orea: „Lo nos trece otro carni, koe bo por come; haci manera bo ta come carni di porco i bo ta scapa bo bida.” Ma Eleázar a responde: „Mehor mi baha den sepulcro. Pasobra na nos edad no ta combini di ganja; hopi hoben, cordando koe Eleázar, un anciano di 90 anja, a bira pagano, por cai den error pa mi motiboe i esai pa mi gana un bida

koe ta pasa; i asina lo mi hala bergüenza i maldicion riba mi biheza. Di pursi, maske mi scapa for di castigoenan di hende, ni na bida ni na morto lo mi no por huf for di mân di Dios todopoderoso.”

Despues di e palabranan, bordugonan a cohé i a hibé na lugar di martirio, camina nan a tormenté cruelmente. Ora e tabata cerca di moeri, el a bisa suspirando: „Bo sabi Senjor, mi ta sufri toer cos coe gustoe, pa miedoe di ofende Bo”.

Asina Eleázar a moeri, largando un ehempel di heroismo pa toer hende.

Despues di es ehempel nobel di Eleázar a sigui un otro di un mama coe su siete jioe, koe a nenga di come carni di porco, i koe pa orden di Antíoco a sufri martirio di mas cruel. E jioe mayor dici coe rey: „Kiko bo kier di nos? Nos ta prefera di moeri, mehor koe di viola ley di Dios”.

Ora rey a tende e palabranan, el a bira furioso di rabia. El a larga nan ranca lenga djé hoben, kita cueroe for di su curpa, kap su pia i su mânnan, i asina nan a tiré den wea ardiente, p'e asa poco-poco.

Despues koe e promer a perde su bida, nan a trece di dos i nan a martirizé di mes manera. Bordugonan a cohé na su cabeí, i el a bisa rey: „Tu, rey di mas impío, awor bo ta kita nos bida, ma un dia Rey di reynan lo lamanta nos pa bida eterna.”

Asina e mama a mira toer su seis jioenan moeri morto di martir; e di mas chikitoe sol a keda. Antíoco a primintié, koe lo e hacié ricoe i teliz, si e nenga su religion; ma e hoben heroico no kier a scucha su palabranan. Es ora ai Antíoco a haci toer su posibel pa e mama conseha



su jioe di bira apóstata. E mama a bai cerca su jioe stimá, a brazé i a spierté, p'e moeri como su roemannan, balente pa Dios i religion. Es ora e mucha a bisa coe ardor: „Lo mi no obedece na orden di rey, ma na ley koe Dios a doena Moyses. Ma bo, o rey, lo bo no scapa for di manoe di Dios.” Rey a larga martiriza es jioe aki muchoe mas cruel koe e otronan; por ultimo nan a mata e mama tambe. Dia 1 di Augustus Iglesia Catolica ta celebra cada anja fiesta di e Martirnan Macabeo.

Santa Escritura ta bisa: „Morto di hustoe ta precioso den bista di Senjor.” Esai nos ta mira den Eleázar i e mama coe su siete jioe. Na lugar di bida temporal, koe nan a perde, nan a haja bida eterna pa recompensa. Si nos ta fiel te na morto, Dios lo doena nos corona di bida eterna.

XLVI.

1. Matatias 2. Hudas Macabeo
3. Morto terribel di Antioco.

1. Den dianan di persecucion djé impío Antíoco tabata biba na Hudea un sacerdote jamá Matatias. Hopi hende a nenga nan fé pa miedoe di paganonan; ma Matatias a bisa: „Maske nan toer nenga nan fé, ami i mi jioenan coe mi roemanan sí lo fica fiel na ley di nos tatanan. Toer koe tin zelo pa ley, sigui mi.”

Su cincoe jioenan: Guan, Simon, Hudas, Eleázar i Jonatas i algun otro Hudioenan, koe a keda fiel, a siguié. Nan a bai riba ceroe i nan número a aumenta mas tantoe toer dia. Pronto nan a bira basta fuerte, pa coeminsa e gera santa. Nan a coeri pasa henter tera, destrui altar nan di dios falsoe i restaura sirbishi di Dios berdadero.

2. Despues di morto di Matatias, su jioe Hudas Macabeo, a bira hefe di es ehército chikitoe. Su forza tabata den confianza riba Dios. El a gana mashá batalja grandi i el a saca Antíoco i su hendenan for di tera di Huda.

Ora el a drenta Herusalem i el a subi ceroe di Sion, el a mira e lugar santoe desolá manera desierto, altar profaná, portanan kimá i plaza di tempel jen di soempinja i jerba. Anto su coerazon a jena coe dolor i el a manda nan limpia toer inmediatamente. El a lamanta un altar nobo i coe un número grandísimo di hende nan a renoba culto di Dios coe himno i canticanan.

Despues di e segunda dedicacion di tempel, sucesornan di Antíoco a bolbe toema arma na mân

contra Hebreonan, ma semper Hudas a rechaza coe animo toer atake i el a caba coe su enemigoenan. Muchoe bez Dios a doena prueba visibel di su judanza coe aparicionnan celestial.



Un dia, koe Hudioenan a sali rezando pa contra nan enemigoenan, a parce di golpi na cabez di nan ehército un cabaljero bistí na blancoe i coe armamento di oro i un lanza skerpi. El a bai nan dilanti. Un otro dia cincoe bringador celestial a parce meimei di batalja, sintá riba cabai coe frená di oro; dos di nan a toema Hudas meimei di nan i a protegé, mientra e tres otronan tabata tira rayo riba enemigoenan. Mas koe 300 mil soldá a moeri den es batalja.

Den un otro bringamentoe Hudas a gana batalja, ma mashá di su soldánan a moeri. Su manece a resulta, kiko tabata motiboe di esai. Ora

nan a cohe mortonan pa dera, a haja bao di nan bistir mashá obheto precioso, koe tabata dedicá na diosnan falsoe. Hudas a manda un suma grandi di placa na Herusalem pa haci sacrificio di reconciliacion pa es mortonan, *ya koe ta un cordamento santoe i saludabel pa reza pa defuntoenan.*

3. Rey Antíoco a bai Persia. Ora el a tende koe nan a bati toer su ehército na Hudea, el a bira furioso i a doena orden, pa bolbe bai aja inmediatamente. El a resolve firmamente, pa caba coe toer Hudioe, ma Dios a castigé coe un enfermedad terribel. Es ora ai el a manda pa shers coeri mas duroe, ma el a cai for di wagen i a herida su curpa gravemente. Esai a haci su enfermedad bira peor; su curpa a putri na bida; bitji a sali afor i ningun hende por a wanta e olor maloe di su heridanán. Es ora ai el a conoce manoe castigador di Dios. El a haci toer sorto di promesa boenita; ma su contricion no tabata sincera. E rey impío a moeri un morto miserabel den dolornan di mas terribel.

Sucesornan di Antíoco a bolbe coeminza gera contra Hudioenan, ma Hudas a bati e numeroso ehércitonan koe nan a manda contra djé.

Desgraciadamente Hudas a risca un dia den un gera mashá desigual. Coe un ehército di 800 homber sol el a coeminza gera contra un ehército di 22 mil homber. Di mainta te anochi nan a bringa manera leon i a tapa tera coe morto. Ma finalmente e Macabeo a sucumbi pa forza superior i a moeri morto di heroë.

Henter pueblo a jora pierde di e balente coe lágrima amargo.

*Morto di Antíoco ta sinja nos koe nos contricion mes-
ter ta sincera pa Dios perdona nos; e ta sinja nos tam-
be ki suerte ta spera persiguidornan di Iglesia. Casi toer
a moeri un morto spantoso ó humiljante, manera his-
toria ta moenstra.*

 XLVII.

Fin di Testament Bieuw.

Como Hudas Macabeo a moeri i su hendenan a haja nan den gran tribulacion, nan a bai cerca Jonatas i a bisé: „Ya koe bo roeman a moeri, nos a scohe bo na su lugar pa nos hefe.”

Jonatas a acepta e mando, koe nan a ofrecé i el a mantene honor di su famia, bringando semper balente i gobernando pueblo coe mashá bon huicio i prudencia.

Ma un dia sin pensa bon el a kere den promesanan enganjosa di amistad di un captan di Siria, camina nan a mata Jonatas coe dos di su jioenan.

Anto nan a eligi Simeon, e único jioe di Ma táticas, koe a keda na bida, pa hefe di pueblo i gran-sacerdote. Esaki a lamanta den Hudioenan nan ánimo antiguo i animá coe fé den Señor; el a libra nan for di jugo di su enemigoenan. Ma despues di muchoe anja koe el a haci su nacion glorioso i siendo ya di un edad avanzá, el a cai pa mân di un traidor, jamá Ptolemeo.

Su jioe Guan Hircano a goberna tambe coe sabiduria; su reinado tabata feliz i glorioso.

Su jioenan Aristobúlo i Alejandro Janéo a siguié como hefe di Hudea; nan tabata kier titulo di rey. Despues muher di Alejandro a toema

rienda di gobierno, pasobra su jioenan tabata menor di edad. Ma semper nan tabatin discordia un coe otro i esai a bira motiboe, koe Romanonan, koe den es tempoe tabata mashá poderoso, a mishi den asuntonan di Hudea.

Promer Hudea mester a paga tributo na Roma, ma pasobra e pleitoe di e dos roeman no kier a stop, reinado romano a ordena pa pone un rey stranjero Herodes riba Hebreonan.

Den es tempoe toer bon Israélita a suspira mashá pa benida di Mesias. Ya un di ultimo profetanan a sclama jen di alegria: „Mira, lo El bini pronto, El na kende boso ta suspira.”


Ora profecia di Jacob na su jioe Huda a cumpli, i *septem ta kitá for di Huda, nos dibino Salvador* a nace, e Deseado di Pueblonan, koe tin nomber semper bendicioná i alabá di

HESU CRISTOE.

Henter Testament Bieuw ta un imagen i preparacion di Testament Nobo. Larga nos gradici Dios koe El a prepara binimentoe di su único Jioe di es manera ai. Toer e figura i imagen ta pa nos un prueba koe Hesu-Cristoe ta e Mesias, e Primintido di pueblonan; pasobra den Djé, i den Djé sol, toer es imagen i figura a haja nan cumplimentoe



INDICE.



	PAGINA.
1. Creacion di mundoe. 2. Adam i Eva.	7
Creacion i caida di Angelnan.	8
Caida di promer hende.	10
Castigoe di promer hende.	11
Cain, Abel i Seth.	13
Diluvio Universal.	15
1. Jioenan di Noë. 2. Toren di Babel.	18
1. Vocacion di Abraham. 2. Lucha i Victoria. 3. Melchisedech.	20
1. Tres angel ta bishita Abraham. 2. Destruccion di Sodoma.	22
1. Obediencia di Abraham. 2. Sacrificio di Isaïc.	25
1. Casamentoe di Isaïc i Rebecca. 2. Esaú i Jacob. Jacob na Mesopotamia.	27
1. Jioenan di Jacob. 2. Roemanning di Josef ta bendé.	31
1. Josef den prison. 2. Su salvacion.	32
Promer biaha di roemanning di Josef na Egipto.	35
1. Segunda biaha di roemanning di Josef na Egipto. 2. Josef ta hacié conocí.	38
1. Jacob na Egipto. 2. Su morto.	39
E homber Santoe Job. Un ehemplo di paciencia i soemision na Santa Boluntad di Dios.	43
1. Esclabitud na Egipto. 2. Nacementoe i crianza di Moises. 3. Su huimentoe.	45
1. Vocacion di Moises. 2. E diez plaganan. 3. Lam- tji di Pascu. 4. Salimentoe for di Egipto.	47
1. Pasamentoe den Lamar Corá. 2. Milagronan den desierto.	49
1. Doenamentoe di ley riba ceroe di Sinaï. 2. Bué di Oro. 3. Tabernaculo.	53
1. E spionnan. 2. Bara di Aäron. 3. Awa di baranca. 4. Colebra di koper. 5. Diferente castigoe.	56
1. Morto di Moises. 2. Biaha den Jordan. 3. Toe- mamentoe di Jericho. 4. Habitantenan di Gabaon. 5. Lucha grandi.	61
1. Hueznan. 2. Gedeon. 3. Samson.	64
	67

	PAGINA.
1. Heli i su jioenan. 2 Samuel.	69
1. Saül, promer Rey. 2. David i e gigante Goliath.	72
1. Odio di Saül. 2. Generosidad di David. 3. Mor- to di Saül.	75
1. Reino di David. 2. Lamantamentoe di Absalon. 3. Morto di David.	79
1. Salomon. 2. Sabiduria di Salomon. 3. Tempel.	83
1. Ultimo anjanan di Salomon. 2. Division di reino.	86
1. Reino di Israël. Jereboam. 2. Acab. Profeta Elias. 3. E biuda di Sarepta.	88
1. Sacrificio di Elias. 2. Naboth. 3. Morto di Acab i Jezabel. 3. Elias a subi na cieloe.	90
1. Profeta Eliséo. 2. Naäman 3. Jonas. 4. Fin di Reino di Israël.	93
Tobias na Asiria.	96
Jioe di Tobias	98
Judith	101
Reino di Huda	103
Esclabitud di Babilonia	105
Tres hoben den forno ardiente.	106
Rey Balthasar	109
Dios falsoe Bel	110
1. Dragon. 2. Daniël den cueba di leon	112
1. Esther i Mardogeo. 2. Aman	113
Persecucion di Antíoco	117
1. Matatias. 2 Hudas Macabeo. 3. Morto teri- bel di Antíoco.	120
Fin di Testament Bieuw	123

